

2421

國朝詞綜

冊一



國朝詞綜

【四時雜俎】

集賢堂

詞綜
卷之四
四時雜俎
詞綜
卷之四
四時雜俎

四部備要

集部

上海中華書局據原刻本

校刊

桐鄉 陸費達 總勤

杭縣 高時顯 輯校

杭縣 吳汝霖 校

丁輔之 監造

序

汪氏晉賢敘竹垞太史詞綜謂詞長短句本于三百篇并漢之樂府其見卓矣而猶未盡也蓋詞實繼古詩而作而詩本於樂樂本乎音音有清濁高下輕重抑揚之別乃爲五音十二律以著之非句有長短無以宣其氣而達其音故孔穎達詩正義謂風雅頌有一二字爲句及至八九字爲句者所以和以人聲而無不協也三百篇後楚辭亦以長短爲聲至漢郊祀歌鏡吹曲房中歌莫不皆然蘇李詩出畫以五言而唐時優伶所歌則七言絕句其餘皆不入樂李太白張志和始爲詞以續樂府之後不知者謂詩之變而其實詩之正也由唐而宋多取詞入於樂府不知者謂樂之變而其實詞正所以合樂也且夫太白之西風殘照漢家陵闕黍離行邁之意也志和之桃花流水考槃衡門之旨也嗣是溫岐韓偓諸人稍及閨襜然樂而不淫怨而不怒亦猶是標梅蔓草之意至柳耆卿黃山谷輩然後多出於褻狎是豈長短句之正哉余弱冠後與海內詞人遊始爲倚聲之學以南宋爲宗相與上下其議論因各出所著并有以國初以來詞集見示者計四五十年來所積旣多歸田後恐

其散佚湮沒遂取已逝者擇而鈔之爲

國朝詞綜四十八卷其蒐采編排吳門陶子梁之力爲多方今人文輩出詞學亦盛於往時我

高宗純皇帝念詩樂失傳甚久

命儒臣取三百篇譜之著以四上六五諸音列以琴瑟笙簫之器于是三百篇皆可奏之樂部則是選諸詞苟使伶人審其陰陽平仄節其太過而劑其不及安有不可入樂者詞可入樂卽與詩之入樂無異也是詞乃詩之苗裔且以補詩之窮余故表而出之以爲今之詞卽古之詩卽孔氏穎達之謂長短句而自明以來專以詞爲詩之餘或以小技目之其不知詩樂之源流亦已慎矣至選詞大指一如竹垞太史所云故續刻于詞綜之後而推廣汪氏之說以告世之工于詞者嘉慶七年十月青浦王昶撰

國朝詞綜目錄

卷一

李元鼎

吳偉業

熊文舉

龔鼎孳

曹溶

陳世祥

趙進美

金鎮

李雯

梁清標

宋微璧

史可程

李蔚

龔百藥

曹垂璨

季振宜

宋琬

宋徵輿

孫自式

魏學渠

魏允枚

唐夢賚

柯聶

何采

王庭

丁彥

周茂源

吳亮中

陳增新

毛萬齡

程光祿

田茂遇

史鑑宗

張我樸

王士祿

曹爾堪

陳璜

周季琬

張淵懿

董衡

卷二

王士禎

張錫懌

丁澎

馮雲驤

劉體仁

周震藻

陸求可

嚴沆

巢震林

黃永

萬錦雯

孫暘

吳兆騫

李天馥

鄒祇謨

毛際可

林雲銘

楊大鯤

孔尚任

張僧乙

張養重

陳允衡

盧元昌

王之暮

魏際瑞

李漁

洪昇

卷三

曹貞吉

支隆求

董俞

董元愷

徐時浚

江皋

沈鱣

葉映榴

吳興祚

宋學

陸世楷

鄭俠如

袁于令

余懷

呂師濂

陸埜

葉大忠

毛蕃

華袞

陳舒

宋大麓

汪价

毛先舒

錢曾

張潮

錢爔

袁殊

王暉

卷四

洪雲來

王賓

陸舜

劉梁嵩

吳綺

曹寅

高士奇

丁煒

丁焯

宋泰淵

宋思玉

華胥

呂洪烈

佟國鼎

佟國器

佟國璵

佟世南

王士禛

顧湄

許旭

潘高

鄒宏志

周綸

秦保寅

卷五

顧貞觀

錢芳標

何鼎

張英

陳玉璠

汪懋麟

何龍文

宮夢仁

徐乾學

王士禛

李振裕

葉燮

錢霞

曹鑑平

徐倬

王鴻緒

王燮

馬鳴鑾

汪鶴孫

卷六

性德

張翼

高層雲

胡會恩

張集

沈三曾

沈涵

葉舒崇

儲右文

毛遠公

王修玉

吳珩

趙執信

楊大鶴

沈朝初

卷七

彭孫通

倪燦

汪霽

王頊齡

秦松齡

周清原

徐嘉炎

陸棻

湯斌

尤侗

高詠

方象瑛

毛奇齡

徐鉉

吳任臣

卷八

朱彝尊

卷九

陳維崧

嚴繩孫

錢金甫

邱象隨

孫枝蔚

鄧漢儀

王昊

王嗣槐

彭桂

羅坤

卷十

李良年

李符

卷十一

汪森

汪文柏

王顯祚

曹爾坊

曹爾埏

吳之登

黃延

吳秉仁

董以寧

牛奐

魯超

梁允植

梁天植

曹封祖

陳慈永

徐喈鳳

黃朱芾

黃錫朋

程康莊

朱克生

吳棠楨

錢廷枚

吳本嵩

張星耀

吳壽潛

朱輅

凌如升

王會圖

卷十二

高不騫

魏允札

陸進

鈕琇

孫鉉

余光耿

王潞

唐虞

陸次雲

萬樹

畢大生

丁介

姜培穎

葉舒璐

趙維烈

錢穀

沈豐垣

江士式

王紹

曹鑑徵

王熹儒

呂鼎

王廷璋

王樞

應振聲

徐鄴

曹濂

牛日收

諸匡鼎

卷十三

沈皞日

孔傳鐸

李璿

蔣睿

林子威

李蕃

吳儀一

張戩

陳謨道

徐榘

俞士彪

林企佩

沈漢

沈永種

魏學洙

沈漳

沈叔培

陳聞

仲恆

周在浚

沈聖昭

于天麒

蔣會貞

孫琮

陸楸

顧戩宜

計善

王攄

卷十四

沈岸登

沈進

沈季友

沈雄

郁植

袁揆燮

王紹雍

王武功

曹亮武

徐允哲

蔣景祁

陳維岱

陳維媚

陳維岳

陳宗石

錢炎

楊通佺

李珍

盛楓

盛禾

盛本柟

陳見鑰

張鑣

卷十五

龔翔麟

王九齡

沈爾燦

馮瑞

俞光曾

高曜

王允持

沈崑

汪灝

黃庭

梁佩蘭

潘宗洛

卷十六

孫致彌

錢肇修

狄億

姜遴

陶爾穉

姚士陞

張璣

陳璋

焦袁熹

高式青

韓獻

姜宸英

魏坤

查嗣璫

范允鈞

張德純

楊守知

卷十七

陳聶恆

姜 垚

卓天寅

賀 宿

江尚質

鄭熙績

葉 藩

史惟圓

陳履端

朱昆田

葉尋源

徐履忱

岳 驥

顧 彩

鄭景會

范 纘

周禹吉

姚景崇

湯豹處

鮑夔生

李錢琇

李伍漢

金 張

柴際溶

曹 柔

顧仲清

沈 渭

李長苞

孔傳誌

雷維馨

金長輿

金 標

周 珂

周 灑

丁 滌

卓允基

卷十八

屠文漪

屠宸楨

徐 瑤

方 炳

沈永令

柯 炳

周稚廉

周稚炳

張欽明

王宗蔚

潘睿隆

陳仲永

潘雲赤

孫序皇

柴 震

倪 濂

徐昌薇

吳貫勉

章士麟

高宗元

徐懷仁

楊之順

俞美英

施 鑒

黃千人

錢 璜

錢來修

卷十九

珍做宋版印

許田

查慎行

張大受

戴錡

毛成肅

沙張白

林之松

顧景文

鄭培

金惟駿

葉之溶

華宗鈺

沈時棟

程庭

陳萼

吳大思

邵崑

秦道然

卷二十

杜詔

程夢星

王敬銘

張梁

顧陳坊

查為仁

陸綸

徐逢吉

樓儼

卷二十一

厲鶚

卷二十二

黃之雋

柯煜

金志韋

楊恆

納蘭常安

許昂霄

張宗櫛

張載華

張玉輪

徐漢倬

顧衡文

華文裕

姚世鈞

張含章

沈灝

沈中震

季元春

吳燮炯

邢汝仁

陳沆

徐振

卷二十三

陸培

沈廷陞

王賓

何夢瑤

林令旭

錢 璽

金 焜

張奕樞

劉錫勇

沈修齡

查 學

吳景果

梁文濂

毛之玉

卷二十四

王時翔

王 愷

王 嵩

陳 枋

卷二十五

毛 健

王 輅

王 嵩

陳 枋

卷二十六

王 策

徐 庾

孫 瞻

陸大復

卷二十七

吳 焯

符 曾

董家驥

黃知彰

陳 濟

金肇鑾

劉 綸

齊召南

張陳典

鄭 燮

馬曰璐

陳榮杰

萬光泰

馬曰瑄

馬曰璐

陳榮杰

卷二十八

陳 章

汪 沆

陳 皋

陸天錫

倪承茂

沈德潛

蔣麟昌

玉太岳

蔣元益

章 愷

鄭廷暘

李 果

韓 騏

陸文蔚

陸文啓

朱 研

方元鹿

張 棟

卷二十九

江炳炎

江昱

卷三十

張四科

張世進

趙虹

閔華

樓鏡

吳廷采

卷三十一

江昉

沈大成

卷三十二

史承謙

任曾貽

儲國鈞

史承豫

卷三十三

張雲錦

朱雲翔

繆謨

周本

陸烜

夏敘典

夏宗沂

夏葛

卷三十四

朱方靄

姚培炎

張冕

徐柱臣

汪棟

廖景文

張裕舉

汪仲鈞

卷三十五

吳煥

周天度

董元度

謝壩

周大樞

汪士通

王鳴盛

王天發

卷三十六

王又曾

凌應曾

查禮

董均

顧詒祿

張玉穀

黃庭

唐司衡

張洪謨

張夢喈

沈超

卷三十七

過春山

朱昂

江立

江聲

卷三十八

汪棣

蔣士銓

彭光斗

畢沅

吳泰來

王文治

曹仁虎

儲祕書

汪為善

陸錫熊

卷三十九

趙文哲

沈開勳

朱漢倬

朱澤生

朱菴恭

蔣業鼎

卷四十

鄭澣

嚴長明

徐薌坡

章謙恆

施朝幹

卷四十一

吳省欽

張熙純

胡奕勳

金兆燕

汪孟頴

陸王任

陳嵒

曹自鑿

汪啓淑

陶元藻

邵玘

邵炎

諸廷槐

王方恆

朱景輔

卷四十二

林蕃鍾

沈起鳳

汪煥

張塤

程晉芳

孔繼涵

施燾

蔣元龍

高文照

吳蘭庭

汪如藻

卷四十三

魏之琇

宋維藩

程名世

王曙

余夢易

熊鈺

汪照

楊源

林克鈺

吳展成

唐宏

章河

王陳梁

張璉

卷四十四

黃景仁

黃易

王復

李日華

李德華

汪如洋

錢塘

吳蔚光

錢棨

余鵬飛

余旻

陳逢堯

卷四十五

沈清瑞

王開沃

金德輿

王陸禔

王啓曾

姚念曾

吳志遠

顧列星

曾煜

殷塏

金式珪

陳澤泰

吳鈞

吳友松

錢青選

徐應階

沈信

余鵬翀

倪象占

金翀

王文潞

王莊壽

卷四十六

冒 褒

朱 謙

王臣 蓋

劉霖 恆

歐陽 德榕

吳啓 思

敖 燾

李際 時

汪 煥

宋慶 長

許孫 荃

何五 雲

傅世 堯

張 恂

孫爾 思

馬自 雋

毛士 儀

董儒 龍

任映 垣

萬秋 期

陸鴻 圖

郭徵 和

蔣韶 年

西泠 酒民

蒿亭 居士

宏 倫

原 詰

高 雲

濟 日

繡 鐵

雲門 僧

西湖 老僧

余一 淳

上 鑒

卷四十七

徐 燦

朱中 楣

吳文 柔

顧貞 立

柳 是

虞北 淑

趙 氏

賀 潔

馮 嫺

侯承 恩

吳 芳

鍾 筠

顏繡 琴

葛 宜

章有 湘

吳森 札

張學 雅

喻 然

沈關 關

沈友 琴

沈御 月

卷四十八

葉弘 緝

顧瑤 華

閔懷 英

郁大 山

潘 端

倪 小

陸鳳 池

毛茂 清

項 珮

邵斯 貞

馮挹 芳

徐元 端

許心榛

金莊

顧之瓊

曹鑑冰

錢鳳綸

沈珮

許宜煥

袁寒篁

陳敬

葉慧光

程扶娥

徐玉暎

許玉晨

胡慎儀

張玉珍

沈纒

沈湘雲

戴陵濤

蓉湖女子

舒霞

方是仙

何月兒

國朝詞綜卷一

青浦 王昶 纂

李元鼎二首

吳偉業八首

熊文舉一首

龔鼎孳三首

曹溶四首

陳世祥一首

趙進美四首

金鎮一首

李雯四首

梁清標五首

宋徵璧一首

史可程一首

李震一首

龔百藥一首

曹垂璨二首

季振宜一首

宋琬五首

宋徵輿二首

孫自式一首

魏學渠一首

魏允枚一首

唐夢賚一首

柯聳一首

何采一首

王庭一首

丁彥一首

周茂源一首

吳亮中一首

陳增新一首

毛萬齡一首

程光祿一首

田茂遇二首

史鑑宗一首

張我樸一首

王士祿一首

曹爾堪四首

陳璜一首

周季琬二首

張淵懿六首

董衡一首

李元鼎字梅公吉水人天啓二年進士國朝官

至兵部侍郎有文江唱和集二卷

鄧孝威云文江詞清真澹雅無富縟之累

又得遠山夫人伉儷倡酬調栗鼓瑟亦詞

林佳話也

醜奴兒令和雨後聽琴

稀疎紅翠簷前滴葉上珠圓牆外聲喧愛聽新涼起

亂蟬逃名疑在青山麓消受涼天一曲遊仙撥碎

西風指上絃

減字木蘭花和遠山

雨朝晴暮艷似芙蓉花上露墨瀋難收一派秋聲紙

上幽倩他傳語應識霜砧往來處曲徑蕭蕭不定

松花墮地飄

吳偉業字駿公號梅村太倉人崇禎四年進士

國朝官國子監祭酒有梅村詞二卷

四庫全書提要云吳偉業詩餘二卷韻協

宮商感均頑豔允足接跡屯田嗣音淮海

王士禎詩稱白髮填詞吳祭酒亦非虛美

尤展成云先生以詩名海內其所諧通
天臺及臨春閣秣陵春諸曲尤膾炙人口
詞在季孟之間雖不多作要皆不乖風雅
之致 王阮亭云婁東祭酒長短句能驅
使南北史爲是體中獨創且流麗穩貼不
徒直逼幼安

如夢令

鎮日鶯愁燕懶徧地落紅誰管睡起燕沉香小飲碧
螺春盃簾捲簾捲一任柳絲風軟

生查子

香爍合歡襦花落雙文枕嬌鳥出房櫳人在梧桐井
小院賭紅牙輪却蒲桃錦學寫貝多經自屑泥金
粉

浣溪沙

斷頰微紅眼半醒背人驀地下堦行摘花高處賭身
輕 細撥薰爐香繚繞嫩塗吟紙墨敬傾慣猜閱事
爲聰明

西江月詠別

烏鵲橋頭夜話櫻桃花下春秋廉纖細雨綠楊舟畫
閣玉人垂手紅袖盈盈粉淚青山翦翦明眸今宵

好夢情誰收一枕別時殘酒

金人捧露盤觀演秣陵春

記當年曾供奉舊霓裳嘆茂陵遺事淒涼酒旗戲鼓
買花簪帽一春狂綠楊池館逢高會身在他鄉喜
新詞初填就無限恨斷人腸爲知音仔細思量偷聲
減字畫堂高燭弄絲簧夜深風月催檀板顧曲周郎

滿江紅蒜山懷古

汜酒南徐聽夜雨江聲千尺記當年阿童東下佛狸
深入白面書生成底用蕭郎羣屐偏輕敵笑風流北
府好譚兵參軍客人事改寒雲白舊壘廢神鴉集
儘沙沉浪洗斷戈殘戟落日樓船鳴鐵鎖西風吹盡
王侯宅任黃蘆苦竹打荒潮漁樵笛

南鄉子新浴

皓腕約金環艷質生香浸玉盤曲曲屏山燈近遠偷
看一樹梨花露未乾扶起意珊珊生怕微風漾翠
紈背立梧桐還避影更闌月轉迴廊半臂寒

木蘭花慢中秋詠月

冰輪誰碾就千尺起嘯臺東記白傅堤邊庾公樓上
幾度曾逢今宵廣寒高處問嫦娥環珮在何峯天上
銀河珠斗人間玉露金風聽江皋鶴唳橫空人影

立梧桐有宮錦袍緋綸巾頭白鐵笛仙翁欲乘月明
飛去過巖城下界打霜鐘醉臥三山絕頂倒看萬箇
長松

熊文舉字公遠南昌人崇禎四年進士 國朝官

至兵部侍郎

南鄉子

秋色集颿檣一帶傷心路渺茫記得郵亭曾繫馬斜
陽人在紅樓倦晚妝 往事隔星霜門巷惜惜砌草
荒崔護重來應不改淒涼燕子呢喃話短長

龔鼎孳字孝昇號芝麓合肥人崇禎七年進士

國朝官至刑部尚書謚端毅有三十二笑

蓉詞一卷

尤展成云先生詞如花間美人自覺斌媚
當與宋子京紅杏枝頭晏同叔桃花扇底
並豔千古 王阮亭云龔尚書驀山溪詞
重來門巷盡日飛紅雨不知其何以佳但
覺神馳心醉

點絳脣 詠草和林和靖韻

簾外河橋綠圍裙帶無人主繡轡行處踏碎梨花雨
目送春山南浦烟光暮牽春去柔腸無數蘇小門

前路

東風第一枝 春夜同秋嶽作

鳳瑄排烟鵝笙沸月歲華初到街鼓柳絲約定歡期
花信催開恨處今宵酒醖又勾引蝶翻蜂聚近小窗
紅雨生生吹做一簾芳霧 飛豔縷紫絨偷度挑錦
字玉麟舊侶遠山千疊銷魂畫屏一聯繡句東風力
軟便逗起春愁無數趁踏青好賦閒情莫遣少年空
去

薄倖秋嶽將以病去湖上留飲寓齋命製一詞

即用其韻

碧簾風縮度早燕花橋月棧喜賽酒歌樓人在共試
錦燈春眼倚曉欄銷瘦腰圍晴湖十里空絲管恨鳳
珮星遙瓊箏屏隔不耐啼鶯冷暖 看麝粉經行處
調馬路綺羅飄散待青迴雙鬢香添半臂片帆吹送
吳趨緩聚稀歡短勸烟篷彩纜多情莫負金樽滿江
頭鼓角惱亂秦臺楚館

曹

溶字潔躬嘉興人崇禎十年進士 國朝官

至戶部侍郎有靜惕堂詞一卷

朱竹垞云余壯日從先生南游嶺表西北
至雲中酒闌燈施往往以小令慢詞更迭

唱和有井水處輒爲銀箏檀板所歌念倚
聲雖小道當其爲之必崇爾雅斥淫哇極
其能事則亦足以宣昭六義鼓吹元音往
者明三百彙詞學失傳先生搜輯遺集余
曾表而出之數十年來浙西填詞者家白
石而戶玉田春容大雅風氣之變實由於
此

滿江紅 錢唐觀潮

浪湧蓬萊高飛撼宋家宮闕誰盪激靈胥一怒惹冠
衝髮點點征帆都卸了海門急鼓聲初發似萬羣風
馬驟銀鞍爭超越江妃笑堆成雪鮫人舞圓如月
正危樓湍轉晚來愁絕城上吳山遮不住亂濤穿到
巖灘歇是英雄未死報讐心秋時節

一萼紅 憶辛卯歲湖上五日事

愛柔花向朱闌借得春影最玲瓏粟玉纖環泥金雙
帶嬌小渾不勝風櫻桃試萹蒲碧醞知有意分我醉
顏紅粉汗涼生繡巾香蹙人在樓中身本三生杜
牧賦鴛鴦遺恨綠葉茸茸錦眉星移彫輪兩散聽徹
清晝疎鐘縱留取同心舊約對湖光空畫兩眉峯況
是黃梅天氣冷到熏籠

蝶戀花 杏花

深巷賣花將客喚候逼清明記取韶光半玉勒城南
芳草岸少年情味天難管斜倚一枝嬌盼遠沽酒
他家細雨空零亂淚濕粉渦紅尚淺有人樓上和春
倦

鳳凰臺上憶吹簫 題朱十靜志居琴趣後

燒燭鴻天惜花雞塞馬卿偏好傷春正翠鈿盈袖弱
絮隨輪無限柔腸宛轉秋雨夜夢想朱脣抽銀管湘
簾乍卷寶鴨橫陳真真者番瘦也酒醒後新詞只
索休頻待繡帆高挂遲日江濱齊列瑤箏檀板攜妙
妓徐步香塵歸難驟寒宵坐來一對愁人

陳世祥

字散木通州人崇禎十二年舉人 國朝
官知縣有含影詞一卷

阮郎歸

宿花蝴蝶惹花飛紗牕閒畫眉女兒生小在香閨開
箱憐舞衣 添線倦卷簾遲闌干讓柳垂隣家相約
踏春堤日長緩緩歸

趙進美

字韞退益都人崇禎十三年進士 國朝
官至福建按察使

望江南

風乍急簾額動雙犀細雨擁衾紅浪皺濃香銷枕翠
痕低無語聽潮雞

菩薩蠻 閨情

獸香不斷紅茵煖繡筐綵線香中展銀尺隔窗聲鶯
啼小院晴 吳紈輕似雪玉手還同潔何處最宜時
沉吟落剪遲

山花子 曉妝

銀蠟初銷寶鴨濃起來珠袜褪酥胸細數枕痕殘夢
遠剩輕紅 雙啓螭奩交翠羽半欹蟬鬢卸金蟲戶
掩蝦鬚寒未減杏花風

醉落魄 望月

木犀小院碧雲夜靜孤輪滿亂紅送影相裙展六曲
屏山翠幙深深捲 麴塵襪薄苔痕軟畫樓咫尺清
光遠水沉香盡歸仍懶繡被入寒不共金鳧煖

金

鎮字又鑣山陰人崇禎十五年舉人 國朝

官江寧按察使

臨江仙 寄汪蛟門舍人

碧玉闌干花影重峭風移過簾旌綠遮庭院少人行
瓊樓春遠纖指按秦箏 手把道書慵自起暗來小
閣斜憑畫圖心事忒分明蒼苔紅藥仙夢記曾經

李

雯字舒章江南華亭人崇禎十五年舉人

國朝官中書舍人有蓼齋詞一卷

珍做宋版印

菩薩蠻

薔薇未洗胭脂雨東風不合催人去心事兩朦朧玉
簫春夢中斜陽芳草隔滿目傷心碧不語問青山
青山響杜鵑

謁金門 紅葉

楓葉舞染出江空天暮隔岸胭脂新雨墮小樓腸斷
處疊疊亂紅秋露又被西風吹去翠袖拾來看幾
度欲題無一語

鵲踏枝 落葉

慘碧愁黃無氣力做盡秋聲砌滿闌干側疑是紗窗
風雨入斜陽又送棲鴉急不比落花多愛惜南北
東西自有人知得昨夜小樓寒四壁半堆金井霜華
白

鳳凰臺上憶吹簫

漏咽銅龍風銷蠟鳳醒來猶倚香篝對雙鸞臨鏡妝
罷還羞滿目青山畫裏縈別緒生怕凝眸難消受一
庭芳草懶上簾鉤悠悠春風度也這千萬垂楊不
繫扁舟自吹簫人去烟鎖雲稠應念別時清淚登臨

處回首江流東風緊落花飛絮遍寫離愁

梁清標

字玉立真定人崇禎十六年進士國朝

官至保和殿大學士有棠村詞二卷

陸盡思云棠村極穠豔而無綺羅薌澤之態所謂生香真色人難學也

望江南

銀燈翦雜坐漏偏遲欲寫烏絲嗔燕子將輪楸局倩
猶兒薌澤乍聞時

玉樓春

花飛南陌東風暮腸斷王孫芳草路綠槐影裏雨初
晴黃鳥聲中春暗去亂山疊疊看無數故國遙遮
雲外樹一年佳景等閒拋好夢欲尋無覓處

轆轤金井

暖雲如粉草芊芊畫閣曉妝時節鸞鏡初開把春衫
香裊拋殘線帖向柳外聽鶯尋蝶淺水溪橋笑招女
伴桃根桃葉沙堤踏青步履儘風吹鈿朵裙衩波
泥門草平蕪逞芙蓉雙頰花鈴暗掣蚤驚見綠楊飛
雪報道春歸海棠落盡杜鵑啼歇

柳梢青

小雨纔收平沙細草綠滿西疇柳眼青歸桃腮紅暈

人倚高樓 家家繡幕簾鈎春不管斜陽旅愁羅綺
風前軟韉影裏馬上牆頭

蘇漠遮寒食

杏花烟榆莢雨綠映平橋又見春如許油壁車輕寒
食路細草芳樽邀取春光駐 嚙鶯樓歸雁浦柳外
梨邊愁煞長亭暮天意也知離別苦片片輕雲遮斷
人行處

宋徵璧

初名存楠字尚木江南華亭人崇禎十六年進士 國朝官潮州府知府

醉花陰

豆蔻梢頭花半吐闌畔微微雨一炷水沈香六曲銀
屏人在深深處 綠紗窗外春鶯語密約防鸚鵡莫
道不消魂翠幙珠樓休放相思去

史可程

字蘧菴大興人明大學士史忠正公可法之弟崇禎十六年進士 國朝官翰林侍

講

河傳豆莢

日上柳絲晴漾綠暗齊腰筠籠采采度溪橋青搖豆

初嬌 春情冶似清明候穿花走潮暈相思逗蠶娘

態比豆花憨春衫嬌拖燕尾尖

李

震字景喬高陽人順治三年進士官至保和

殿大學士謚文勤

三字令

愁倚戶夕陽斜憶天涯春去也在誰家燕營巢蜂釀
蜜總堪嗟人不到見歸鴉掩窗紗開復落刺桐花
酒漂零香冷淡負年華

龔百藥字介眉武進人順治三年進士

桃源憶故人 春愁

紅桃雨散東風起濯濯楊枝如水天別放春何地只
在鶯花裏花朝撲蝶誰家會點點飛花輕墜自有
舊愁牽繫不為新憔悴

曹垂璨字天祺上海人順治四年進士官遂安縣

知縣

憶秦娥 蟋蟀

聲淒切輕寒庭院終宵咽終宵咽銀床清露碧紗涼
月井梧葉落征鴻滅無端憶著當年別當年別個
人今夜愁腸千結

夢揚州 聽雨

晚烟稠正孤燈影暈凝眸間理銀箏簾幙蕭瑟如秋
小窗外簷鈴鈴斷續繡幃空掩金鈎天涯遠人何處無

端數徧更籌 游興春來盡休 但因柳欺花流水含

愁點點蕉聲心事都上眉頭黯淡芳草連天碧梁燕

棲霧鎖重樓春去也香消鵲尾夢斷揚州

季振宜字滄葦泰興人順治四年進士官至監察

御史

南鄉子

曉霧如烟輕寒細雨困人天紅杏枝頭鶯對語飛去
昨夜玉人春夢處

宋

琬字玉叔號荔裳萊陽人順治四年進士官

至四川按察使有二鄉亭詞一卷

董蒼水云玉叔慢詞多商羽之音如秋颺

拂林哀泉動壑小令則如新箏乍調雛鶯

初囀尖佻新豔

浣溪沙

乍暖猶寒二月天玉樓長傍博山眠沉香火冷少人
添殘雪纔消春鳥呀畫闌干外草芊綿幾時青得

到郎邊

憶秦娥

朱闌畔莫愁嬌小曾相見曾相見翠娥羞斂半遮團
扇畫梁依舊巢雙燕藏雅幾度垂楊換垂楊換桃

花臨水那時人面

攤破浣溪沙 西溪訪陸處士作

三月楊梅正作花
板橋欹側俯晴沙
閒覓柴門無路
徑柳陰遮
燕子匆忙營故壘
蜂兒辛苦坐官衙
問著山翁都不識
野人家

蝶戀花 旅月懷人

月去疎簾纔數尺
烏鶻驚飛一片傷心白
萬里故人
鬪塞隔南樓
誰弄梅花笛
蟋蟀燈前欺病客
清影徘徊欲睡何由得
牆角芭蕉風瑟瑟
生憎遮掩牕兒黑

一翦梅 思家作

飄泊東南劇可憐
朝上菱船暮上魚船
愁中看遍好山川
鶯脰湖邊
罨畫溪邊
因循何日賦歸田
說道今年又早明年
故園消息思茫然
春燕來前秋雁來前

宋徵輿 字轅文 江南華亭人 順治四年進士官至副都御史 有海閩香詞一卷

小重山

春流半繞鳳凰臺
十年花月夜
泛金杯
玉簫鳴咽畫船開
清風起
移棹上秦淮
客夢五更迴
清砧迎塞

雁渡江來景陽金井斷蒼苔無人處秋雨落宮槐

踏莎行

錦屋銷香翠屏生霧妝成漫倚紗窗住一雙青雀到
空庭梅花自落無人處回首天涯歸期又誤羅衣
不耐東風舞垂楊枝上月華生可憐獨上銀床去
孫自式字衣月武進人順治四年進士官檢討

西江月

身世飄飄落葉生涯泛泛孤舟客心未冷已成秋况
是淒涼重九何處砧聲邨曲誰家笛響樓頭十千
沽酒欲消愁不奈愁多於酒

魏學渠

字子存嘉善人順治五年舉人官刑部主
事有青城詞三卷

柳梢青旅思

水落平沙飛來塞雁聲到窗紗蛩語斜陽鴉翻墜葉
秋在蘆花村烟一抹殘霞指帘影溪邊酒家白露
催寒青衫淚濕况聽琵琶

魏允枝

字卜臣嘉善人順治五年舉人官西安縣
教諭

蘇幕遮同香巖曉發平原

隴頭雲坡上雪風掃枯楊滿地堆黃葉共對孤燈宵

漏咽一枕寒雞叫斷荒村月 旅魂消鄉思折夢杏
家山塞草連天闊野燒前村光未滅緩控金羈滿路
霜華滑

唐夢賚字濟武淄川人順治六年進士官檢討有
志壑堂詞一卷

浣溪沙

愚谷山頭放畫橈誰家茆屋出林臯一溪流水繞紅
橋 啣尾草邊翻蝶夢將雛花外挂鶯巢東風鎮日
綠楊梢

柯 聳字素培嘉善人順治六年進士官通政司

左參議

離亭燕

趁得東風飛絮來認杏梁深處留下舊巢渾不改且
喜主人相許新補野芹香並立綺窗相語 秋信甫
經殘暑又是淒風疎雨王謝家空餘草舍休聽旗亭
金縷回念故鄉遙斜日捲簾歸去

何 采字滌源上元人順治六年進士官侍讀有

南澗詞一卷

湯潛菴云省齋小詞數闋蕭涼高逸能與
稼軒放翁馳騁上下

滿江紅九日雨中飲許穎長亭子

採菊東籬應喚作淵明佳節絕勝似燈船簫鼓星橋
花月一盞老春歌白苧滿庭小雨翻黃葉儘今朝仔
細看茱萸明年說知誰健愁須撥用我法情偏愜
况霜螿盈把露蟬低咽舊識漸稀詩酒伴新銜重補
漁樵闕更休教落帽晚風前羞華髮

王

庭

字言遠嘉興人順治六年進士官至山西
布政使有秋闈詞一卷

暗香漢口夜泊

半城落日噪亂雅驚起垂天雲黑小艇泊來不住江
南住江北黃鶴樓荒何在只十里烟波凝碧聽不到
醉酒仙人樓上夜吹笛行客眠未得欲寄與暗懷
難附飛翼停歌月出鸚鵡洲橫動寒色歷歷晴川草
樹輕浪捲一江風急待曉發雞唱也滿帆霜白

丁

彥

字文博嘉善人順治六年進士官工部都
水司主事督理江南蘆政

浣溪沙梅花

目盡蒼寒引翠尊一行江樹繞山邨輕花著處暈無
痕全付春心愁白雪半籠淡月到黃昏碎風零雨
暗消魂

周茂源字宿來江南華亭人順治六年進士官處
州府知府有鶴靜堂集十四卷

浣溪沙懷宋尚木潮州

燕寢凝香賦倍工鳳山樓外海雲紅吟鞭搖斷夕陽
中渡口桄榔沉夜雨花邊翡翠怯春風知君鄉夢
到江東

吳亮中字止仲嘉善人順治六年進士官戶部郎

中

唐多令

芳草綠芊芊微雲散遠天掠青莎孤鶴翩翩野岸
醺開又掩蘋葉小正如錢攜酒到花前花殘聽杜
鵑醉忘醒醒又忘年雙板橋南修竹裏曾記得挽魚
船

陳增新字子更嘉善人順治七年舉人官安仁縣

知縣

風中柳春恨

紫燕來時怎奈一春風雨恨東君無緣作主夢迴孤
枕驀地縈愁緒剔殘燈倚闌無語薄倖征人終歲
羈留何處問歸期金錢莫據腰肢消損把年華空度
倩子規早催歸去

毛萬齡 字大千 蕭山人 順治七年拔貢生 官仁和

縣教諭 有綵衣堂集

蕭湘神

叢嶂迷黃陵 朝暮鷓鴣啼 神女不知何處去 行雲渺

渺數峯西

程光祿 字奕先 錢唐人 順治八年舉人

鳳凰臺上憶吹簫

有意拈鍼無心添線 何時細語憑肩 正蝶雙牆裏 燕
偶簾前 好把春心攬 亂渾無緒 總為情牽 難留住 梨
妝褪 雪桃靨 飛烟 無緣箇人去也 應繡著芙蓉藕
斷絲連 任門塵蛛網 階積苔錢 池畔微波吹皺 春殘
處 柳岸莎田 風來處 桐花亂落 敲響琴弦

田茂遇 字楫公 青浦人 順治八年舉人 有綠水詞

清平詞各一卷

南鄉子

細草平沙行 春緩緩 七香車 翠羽雙雙 花外起 花裏
倒影紅樓斜照水

又

花濕鶯脣小 風壓麥浪鱗鱗 西去青青官柳路 扁朱
戶 一任啼紅催日暮

史鑑宗字遠公金壇人順治八年舉人官教諭有

青堂詞一卷

摸魚子 清明悼徐郎

正愁人梨花絲雨釀來春恨如醉玉鈎何處消魂曲
長笛一聲吹碎鐙下淚都化作落紅點點風前墜這
番憔悴向斜日荒原一坏猶在杜宇數聲裏 當年
會楊柳曉風情味烟江縹緲無際玉笙指冷春寒夜
此意只君應記君去矣空剩得歌珠一串梁塵內招
魂無計看燕燕鶯鶯朝朝暮暮夢繞亂山翠

張我樸

字伯還嘉善人順治九年進士官大理寺
左評事

望江南

行春遍舞蝶試香衣竹徑綠深雲欲聚花間紅濕雨
初肥何處踏春歸

王士祿

字子底號西樵山東新城人順治九年進

士官吏部考工司員外郎有炊聞詞二卷

四庫全書提要云王士祿炊聞詞一百七

十三首其中如漁歌子之逐鷺微鳧下遠

洲生查子之皆憐好月癡點絳脣之兩鵝

空庭卜算子之暗燭影疑冰皆未免失之

瑤琢爲過于求奇之病非詞家本色也

珍做宋版印

浣溪沙

金井風微響轆轤桐陰漏日曉妝初薄寒猶怯玉肌
膚簾幙絮縈雙紫燕盆池花襯小紅魚晝長耽閣

繡工夫

曹爾堪字子顧嘉善人順治九年進士官侍讀學

士有南溪詞二卷

尤展成云近日詞家愛寫閨襜易流狎昵
蹈揚湖海動涉叫囂二者交病顧菴工于
寓意發爲雅音品格當在周秦姜史之間

點絳脣

沙暖蒲香鳳池漲綠晴波皺搓黃蠻柳三月春方透
小徑閒吟碧蘚生鴛鴦消晴晝雨絲拖逗贏得梨
花瘦

采桑子

晚風吹破流蘇暖花滿香奩蝶滿湘簾拾起殘紅玉
笋尖未梳蟬鬢如雲壓膏沐微沾宮粉輕拈十樣
新眉懶去添

清平樂

閨詞

眉痕頻皺不似東風舊欺盡孤眠寒更透生得腰肢

原瘦 梨花靜掩長門尋常過幾黃昏魂向當初銷
盡如何又說銷魂

醉花陰

烘桃熨柳春方縱紅雨花梢重風日近清明幾片榆
錢都算鶯兒俸 冷烟堆徑和誰共苔補閒堦空杜
宇莫頻啼不喚人歸只喚三更夢

陳

璜字元卿臨海人順治九年進士官壽張縣

知縣

鷓鴣天舟行

客夢初回聽水聲香銷燈燼隔重城一湖月影波光
白兩岸蛩吟草色青 秋欲老睡難成薄寒誰與問
卿卿碧霞僊子知相待重與吹笙醉玉京

周季琬

字禹卿宜興人順治九年進士官至監察
御史有夢墨軒詞一卷

雨中花海棠

欄外濕紅嬌欲滴多因睡足渾無力看徑草青齊池
紋綠皺猶有輕寒逼 最妬朝霞分艷色任暮雨絲
絲如織歸燕啄餘香留連枝上去歲曾相識

蝶戀花

影落中庭花欲午蝶瘦蜂忙翻出新愁譜獨倚雕欄

人不語晴絲無力隨風舞
睡起枕紋猶半露香玉
紅生似把啼痕補還笑
鵲聲無底據春歸畢竟歸何處

張淵懿字硯銘青浦人順治十一年舉人有月聽

軒詩餘一卷

周冰持云月聽詞鑿去尖刻以溫潤爲體
深得樂府之遺

南歌子

篆冷香魂去花輕月影添
夜闌寒色滿重簷剛是小
鬟低語下珠簾

搗練子

香乍燼漏將殘疎影重重入
畫闌清夜夢回花氣冷
小樓月滿雁聲寒

浣溪沙

閨怨

春事飄零付晚風小樓長伴一燈紅
藏鈎無對只猜空
愁緒不隨烟縷斷悶懷還似月陰重
羅衣辜負兩心同

小重山

春閨

日染花枝露欲收輕攏殘鬢影不梳
頭曉風催燕出
紅樓敲翠羽閒語待簾鈎
無計送離愁闌干空遍

倚幾時休烟波搖蕩渡前舟楊柳外春浪拍天浮

臨江仙

風捲亂雅衝霧去綺窗人對香篝篆烟微裊畫屏幽
半簾垂曉日雙笑隔朱樓 惆悵不堪還極目惜花
翻爲花愁木蘭船下水空流暗催青鬢老腸斷白蘋
秋

漁家傲 東昌道上

野草淒淒經雨碧遠山一抹晴雲積午睡覺來愁似
織孤帆直游絲繞夢飛無力 古渡人家烟水隔鄉
心繚亂垂楊陌鴻雁自南人自北風蕭瑟荻花滿地
秋江白

董 衡字□□吳江人順治十一年舉人

風中柳

綠水輕颺吹透黃金千縷怯微寒依依南浦殘烟冪
歷玉笛和鶯語傍妝樓纖腰低舞 長是消魂情盡
橋邊人去繫蘭舟暗添紅雨三眠乍起見栖鴉無數
慣飄搖露堤霜渚

國朝詞綜卷一

卷之六

六

六

六

六

六

六

六

六

六

六

六

六

六

六

六

六

六

王士禎十六首

青浦

王

昶

纂

丁澎七首

張錫懌二首

劉體仁一首

馮雲驥一首

陸求可一首

周宸藻一首

巢震林一首

嚴沆二首

萬錦雯二首

黃永一首

吳兆騫一首

孫暘五首

鄒祇謨二首

李天馥四首

林雲銘一首

毛際可二首

孔尚任一首

楊大鯤二首

張養重一首

張僧乙一首

盧元昌一首

陳允衡一首

魏際瑞一首

王之譽二首

洪昇一首

李漁一首

王士禎字貽上號阮亭山東新城人順治十八年

進士官至刑部尚書追謚文簡有衍波詞

一卷彭羨門云衍波詞體備唐宋美非一

族江上之風高雁斷蜀岡之亂柳啼鴉贈

雁之水碧沙明參橫月落遠向瀟湘去直
合東坡稼軒白石梅溪為一手 鄒程村
云衍波詞小令極哀豔之深情窮倩盼之
逸趣其醉花陰浣溪沙諸闕不減南唐二
主也

望江南

江南好春暮雨廉纖魚子天晴初出水鼠姑風細不
鉤簾底事惱江淹

又

江南好畫舫聽吳歌萬樹垂楊青似黛一灣春水碧
於羅懊惱是橫波

點絳脣 春詞和漱玉韻

水滿春塘柳綿又蘸黃金縷燕兒來去陣陣梨花雨
情似黃絲歷亂難成緒凝眸處白蘋紅樹不見西

洲路

浣溪沙

雨後蟲絲罨碧紗朝來鵲語鬪簷牙日痕紅曙一欄
花殘夢未遙猶眷戀篆烟初裊半夭邪消魂應憶

秦娘家

又

柳暖花寒雨似酥
流鶯和夢覺來無
東風料峭捲蝦鬚
欲覺瀟湘屏上路
楚山如黛少雙魚
口脂慵點鏡中朱

又

小院蘼蕪欲作叢
鞦韆池畔畫堂東
日斜鶯轉謝娘慵
情思詭人何處去
碧桐陰裏下簾櫳
玉釵微墮髻鬟鬆

又

寶馬流蘇上洛津
玉人相見宋家隣
重重屈戌掩殘春
檀暈乍消星的淺
眉痕初淡月稜新
簾衣如縠映橫陳

減字木蘭花 楊花和弇洲韻

紗窗夢起極目玉關人
萬里斜綰千條自古銷魂是
灞橋春陰不盡除却殘鶯誰借問
陌上樓前消得香闥幾日憐

柳含烟

銷魂樹曲江邊移自永豐坊
裏東風吹雪又吹綿
艷陽天何處行人歌水調
極目粘天芳草錦帆曾此
向天涯落誰家

應天長 刺繡

錢春時節深深院睡起金衣花外轉繡牀輕素絲軟
一幅吳綾秋水面麝烟微螺黛淺衣上唾絨紅濺
花落日長人倦偏髻拖殘線

醉花陰

香閨小院閒清晝屈戌交銅獸幾日怯輕寒簫局香
濃不覺春先透韶光轉眼梅花後又催裁羅袖最
怕日初長生受鶯花打疊人消瘦

拜星月慢踏青

雨暈紅酥波酣碧醞乍是清明百五花信風輕拂繡
簾珠戶人初起慵向鏡臺勻面何處隔窗低語青雀
傳書約踏青同去樂游原一片香車度玉津園十
里烟花路無恙往歲春光又匆匆相遇倩游絲牽惹
東君住消魂絕幾陣棠梨雨呼女伴歸去瓊閨掩漫
天飛絮

浣溪沙

出鎮淮門循小秦淮折而北陂岸起伏

多態竹木蒼鬱清流映帶人家多因水

爲園亭樹溪塘幽窈而明瑟頗盡四時

之美拏小艇循河西北行林木盡處有

橋宛然如垂虹下飲于澗又如麗人靚

妝絳服流照明鏡中所謂紅橋也游入

登平山堂率至法海寺捨舟而陸徑必
出紅橋下橋四面皆人家荷塘六七月
間茵蔯作花香聞數里青簾白舫絡繹
如織良謂勝游矣因填小令志之

北郭清溪一帶流紅橋風物眼中秋綠楊城郭是揚
州西望雷塘何處是香魂零落使人愁澹烟芳草
舊迷樓

菩薩蠻 迷藏

玉蘭花發清明近花間小蝶黏香鬢邀伴捉迷藏露
微花氣涼花深防暗邏潛向花陰躲蟬翼惹花枝
背人扶鬢絲

又彈琴

玲瓏嵌石紅蕉葉蕉陰寶鴨香初爇獨整素琴彈琴
清玉手寒聲聲珠作串彈出湘君怨今夜夢瀟湘
琴心秋水長鄒程村云青溪遺事諸首摹畫坊曲瑣
事可謂盡態極妍阮亭拂箋吮毫時便如杜牧韓偓
身經游歷尋歡窈窕含睇纏綿青樓紫陌得此點染
又何必周昉輩以寫生論工拙耶

張錫懌字宏軒上海人順治十二年進士官泰安

州知州有嘯谷餘聲一卷

孫愷似云嘯谷詞其源出于東坡而温雅
綿麗含蓄不露則斟酌于小山淮海之間

錦堂春納涼

池暝濃烟蔽竹庭虛皓月窺廊梧桐篩影闌干上低
拂竹方床螢火暗驚團扇爐烟細裊茶香倦來一
枕羲皇夢隨意繞瀟湘

玉蝴蝶春思

乍暖乍寒天氣登樓送目芳草萋萋百丈游絲繞樹
杏花槐溪綠初勻雨梳弱柳青不斷烟鎖長堤日遲
遲雙眉慵展悄地相思凄其舊歡如夢箏調銀甲
酒泛醪醖試卜金錢未知何日是歸期坐黃昏燕歸
藻井臨曲檻花隱翠窠信音稀憑誰堪寄有淚空垂
丁 彭字飛濤仁和人順治十二年進士官禮部

郎中有扶荔詞三卷詞變一卷

宗定九云扶荔詞如瑣窗寒詠東風入柳

非烟弄花無影柳初新詠柳及早和他同

倚怕消魂夕陽飛絮凄楚回環情味無盡

以視花間草堂諸詞不啻奴盧橘而婢黃

柑輿蒲萄而隸答選

攤破浣溪沙

一翦鴉翎半鞦韆，肩生憎嬌小。向人前曾解東風多少。
恨自今年，愛唱新翻歌尚怯。學梳時樣髻，長偏捉得蜻蜓雙疊。翅背人看。

醉花陰

春暮和清照韻

簾影沉沉移午晝，迷迭消金獸。彈淚上花梢，一霎風吟，片片臙脂透。困人天氣黃梅候，粉汗沾羅袖。鸞鏡掩重開，試揣紅綿，却是何時瘦。

又寒食

牆角秋千紅影度，踏遍新苔露。眉恨寄天桃，賺燕迷鶯，都是相思樹。柳絲烟挽湘簾暮，春悶晴如雨。樓不更飛花，屈戍重重，難鎖東風住。

虞美人 春恨

夕香人去金猊冷，翠掩屏山影。合歡一夜滿庭開，蝴蝶不知人恨，却飛來。片時枕上春勾引，已是消魂盡。夢回留得幾多魂，又被妨歸，催去二三分。

蝶戀花

嫩綠枝頭鶯睡穩，羞帶宜男，閒却雙蟬鬢。夢逐春歸和淚搵，薔薇消得東風恨。眉鎖斜陽添薄暈，初試水綃，漸覺香肌褪。蝴蝶也知春意盡，花鬢亂落輕黃粉。

行香子 離情

纔住香車忽過平沙片時間入遠天涯今宵好夢何處尋他但一更鐘三更雨五更鴉愁對飛花怕見殘霞別離情付與琵琶斷魂江上吹落誰家正夢兒來燈兒暈枕兒斜

柳初新 本意

雪殘小苑東風住放嫩黃初吐蝶香未染鶯梭猶澁夢隱池塘輕霧最惜纖腰如楚恐難禁灞橋人去翠閣凝眸低語看春衫半分金縷因風么裊柔條無力挽不盡隴煙湘雨及早和他同倚怕消魂夕陽飛絮

馮雲驥

字訥生振武衛人順治十二年進士有寒山詩餘一卷

浣溪沙

十里晴波鏡裏天雙雙鸂鶒傍沙眠釣絲冉冉弄江烟潮水平時紅棹穩斜風吹處綠蓑偏繫舟常在古梅邊

劉體仁

字公勇潁州人順治十二年進士官吏部考功司郎中有七頌堂集詞附

秦樓月 別恨

簫聲咽峭寒輕暖花時節花時節蒲帆帶雨明朝成
別 呪他簾桁銀鈎曳輕教燕子分飛徹分飛徹拂
絃紅袖淚痕重浥

周宸藻字端臣嘉善人順治十二年進士官陝西
道監察御史有柿葉齋集

浪淘沙

鶯燕太匆忙倚旒風光玉梭和淚織流黃蹙得遠山
眉又淺怕整殘妝 今夕在何鄉羅綺餘香空教寶
瑟弄初涼眼底青春今去也花落銀床

陸求可字咸一山陽人順治十二年進士官刑部

郎中有密菴詩餘四卷

帶人嬌湖上柳

輕暖輕寒釀就湖頭柳色搖蕩處黛煙如滴朱樓掩
映繫玉郎金勒鎮日裏多少燕穿鶯擲 張緒當年
風流堪識蠻腰細東風偏急三眠乍起共波光爭碧
晴陌上不送陽關行客

巖 沈字子餐餘杭人順治十二年進士官至戶

部侍郎

卜算子秋夜

布被早寒輕燈盞空傳喜今夜應過昨夜長况未醺

醺醉 簷外又西風吹過庭槐墜敗葉虛窗響到明
那許愁人睡

蝶戀花

幾日棟花風不住零落殘英簾外飛還聚慣向池塘
吹柳絮遊絲也逐東西去 謝女剛吟腸斷句一箇
黃鶯似共愁人語槐葉空陰無意緒黃昏又是纖纖
雨

巢震林武進人順治十二年進士

如夢令 春閨

艷曲背人偷和小疊雲箋粉宛窗下理春衣重認石
華新唾無那無那繡被半溫愁臥

黃 永字雲孫武進人順治十二年進士官刑部

郎中

醜奴兒

風風雨雨二十四橋凝望處玉佩丁東翡翠屏間醉
小紅 揚州歌吹別院笙簫花底媚人在黃昏金鴨
香消半掩門

萬錦雯字雲紱宜興人順治十二年進士官中書

舍人

滿庭芳 九日

墜葉敲牕枯藤掃壁西風吹老年華自憐萍梗歲歲
客天涯又是重陽到也從何覓桑苧煎茶空回首畫
溪雲樹都被亂峯遮無邊搖落恨况逢多病觸緒
堪嗟任短衫塵宛破帽欹斜鎮日無人獨坐幾孤負
綠醕黃花疎櫺外淡烟殘照腸斷欲棲鴉

風流子

長天望不極秋容淡羈客渺何依念牢落一身愁來
影共伶仃諸弟別後音稀消魂處葉兼疎雨下鴻帶
斷雲飛新夢砧回獨堆殘卷矮牕燈映自掩重扉
年華容易去浮生事無奈日與心違兩鬢星星欲點
猶未知歸想菰米波漂誰尋鷗社釣絲烟卷莫掃漁
磯孤負西溪好景益悔今非

孫

賜字赤霞號蔗菴常熟人順治十四年舉人

有折柳詞一卷

朱竹垞云蔗菴詞心情澹雅寄託遙深能
盡洗草堂陋習與柘西交最深近復同住
雙柏樹下坐臥研論宜其詞之工也顧
梁汾云折柳諸作極清婉妍秀之致較浣
紅居詞體格又一變矣

憶舊游

送劉震修游武林

喜故人無恙天外歸來同慰飄零別淚收還未恁匆
匆吟屐又向蘭陵久客怕聞驪唱老去更關情看一
抹青山藕花風裏落日亭亭 西泠殢人處是月澹
蘇堤雨暗南屏綠水迎雙槳羨暖香十里碧樹千層
舊游易牽離思鄉夢夜來曾待春柳生烟段橋載酒
同聽鶯

解連環送鮑子韶歸贛州卽次留別原韻

紅箋題遍傍桃花不見舊時人面甚閒情更譜新詞
又興切歸兮悲歌彈劍班馬蕭蕭嘶寒月蘆溝一片
問銀箏何處今宵酒醒雞聲茅店 休嗟鬢絲易染
看昔游如夢荆高都散且鼓柁章貢臺邊向碧苻香
籬釣絲重展待寫羊裙寄愁與南雲新鴈最關情門
掩殘陽江空歲宴

真珠簾送錢庸亭歸里

庭隴昨夜吟芳樹做輕寒幾點芭蕉新雨故故亂鄉
愁向金門延佇見說三江鱸正美早斜艤扁舟南浦
去去趁月滿潮生布帆休住 相送潞水橋邊恨蕭
疎楊柳又遮前路計日到吳趨正黃花堪數應有床
頭新釀熟羨舉案雙眉猶嫵楚楚聽翦燭西窗畫屏

木蘭花慢送陸義山請假歸里

秋風生乍浦香稻熟紫螯肥任嫩擘黃芽甜分紅柰
不換萼絲絲柘西舊時鷗鷺白蘋邊幾度怨歸遲昨日
陳情天上宵來夢到漁磯 霏霏薄雪一些兒爲爾
洗塵緇想賀監風流烟波詩景未許人知漫疑終南
捷徑只山雲堪與說心期高臥不聞朝請隨他月落
烏啼

掃花游送徐果亭請假歸里

驪歌忽聽正九陌收燈兩番花信鞭梢破冷看題香
驛路柳黃莎嫩望到烟螺知是江南岸近切須問問
吳苑落紅猶未成陣 湖上浮小艇又酒泛醱醱味
添櫻筍醉鄉夢穩夢京華只有池塘新韻興在東山
不羨諸公袞袞君休哂對春風幾多青鬢

吳兆騫字漢槎吳江人順治十四年舉人有秋笳

詞

念奴嬌家信至有感

牧羝沙磧待風鬢喚作雨工行雨不是垂虹亭子上
休盼綠楊烟縷白葦燒殘黃榆吹落也算相思樹空
題裂帛迢迢南北無據 消受水驛山程燈昏被冷
夢裏偏叨絮兒女心腸英雄淚抵死偏縈離緒錦字

一珍做宋版印
閨中瓊枝海角辛苦隨窮戍柴車冰雪七香金犢何處

李天馥

字湘北永城人順治十五年進士官至武

英殿大學士謚文定有容齋詞一卷

曹秋岳云楊用修評陸務觀詞纖豔如淮
海沉雄似東坡余謂容齋能兼擅所長

憶王孫春望

妬春良夜愛春朝花外紅樓捲絳綃極目香塵舊板
橋路迢迢不見歸鞍見柳條

菩薩蠻

紀游和龔芝麓尚書

落紅萬片花如雨子規聲裏啼春去春去有人愁鳴
箏懶下樓伴羞嬌掩袖知否情依舊小立怕催歸
貪看雙燕飛

烏夜啼採蓮

遠山漸隱斜陽渡橫塘行到綠楊深處畫檣香
笑
藻畔紅波亂濺羅裳怕摘青青蓮子有空房

小重山閨情

屏掩瀟湘畫裏看芙蓉金屈戌錦交關黃星一點夕
陽山臨晚鏡無計避孤鸞
綵屨石榴斑銀泥蝴蝶
小玉弓寒香堦偶立不知還徘徊久端爲出來難

鄒祗謨字詒士武進人順治十五年進士有麗農

詞二卷

山花子 春愁

澹白春烟花信宜紅雲到處冒遊絲自是淒涼渾不
管總難支 小雨三更歸夢濕輕烟十里亂愁迷幸
有姊歸能解事未曾啼

山亭柳 詠隋堤新柳

紋徽微流正萬縷初柔垂綺苑映妝樓此日藏鴉多
少他時繫馬遲留漸漸綠深黃淺一帶烟浮 花花
絮絮雷塘路風風雨雨到邗溝初學舞慣含愁遠恨
能傳玉笛輕寒乍到紅篝最是長條牽惹人在蘭舟
毛際可字會侯遂安人順治十五年進士授漳德

府推官改官知縣有浣雪詞鈔二卷

沈昭子云會侯博洽研貫其所為詞俱審

音協律不愧大晟樂府之遺

謁金門 夏閨

雛燕轉雨過綠槐如染小徑行來蓮印淺新苔添數
點 簾上鰕鬚半捲甌內鳳團初碾瞥見回廊羞自
掩衫輕微露腕

清平樂 春愁

國朝詞綜 卷二

落花時節和淚飄紅雪畢竟淚流無斷絕不似飛花
先歇 春愁百計難醫天涯隔斷相思除是花長不
謝與伊同撚花枝

林雲銘字西仲閩縣人順治十五年進士

如夢令

剛把書燈吹隱輾轉寒衾不定客夢總難成何待夜
鐘敲醒休寢休寢殘月一條孤枕

楊大鯤字九搏武進人順治十六年進士

如夢令

曉日和鶯催曙捲起一簾風絮無語暗低徊悄立落
花深處絲雨絲雨又送一年春去

踏莎行 春半

綠重平池紅飛清晝倚闌人別花時候小桃無語對
人愁垂楊欲舞和腰瘦 燕子初歸海棠香透疎雲
帶雨鳴鴛鴦重門深閉鎖窗寒去年春恨依然又

孔尚任字季重號東塘曲阜人聖裔官戶部郎中

鷓鴣天

院靜廚寒睡起遲秣陵人老看花時城連曉雨枯陵
樹江帶春潮壞殿基 傷往事寫新詞客愁鄉夢亂
如絲不知烟水西村舍燕子今年宿傍誰

張僧乙原名銘字西友嘉定人諸生有紫庭詩鈔

一卷詞附

清平樂 收燈詞

收燈時候春嫩寒猶逗畫鼓無聲明月瘦寂寞翠鬢紅袖
沉沉深鎖重門停歌罷舞消魂逐漸蜂翻蝶趁殘梅細草春園

張養重字虞山山陽人

浣溪紗 紅橋卽事同阮亭作

狹巷朱樓認妾家捲簾初下碧油車東風翠袖曳輕紗
岸上鶯歌隨柳弱水邊燕尾掠波斜春江流落可憐花

陳允衡字伯璣南城人

浣溪沙 紅橋感舊和阮亭

隱隱簫聲送畫橈迷樓無影見平橋不須指點已魂銷
港口荷花紅冉冉岸邊野草碧迢迢遊人依舊弄新潮

盧元昌字文子江南華亭人諸生

醉花陰 和轅文重九作

暮雲靄靄高樓閉客整看花騎莫遣到南陵一片江山
慣賺登高淚青帘十里誰家肆笑解金龜寄回

首漫銷魂不是西風誰把黃花醉

王之蓐字季猷青浦人布衣

浪淘沙 秋遊

曉月一霜天紅葉春妍碧波蕩槳木蘭船玉管遏雲
歌白雪淺撥湘絃遺鳥落金鈿翠黛秋烟流霞人
醉海棠眠別樣風情歸去也錦字題箋

浣溪沙 擬豔

風露高寒雉尾涼屏開雲母響珠璫宛如湘水步霓
裳鳳瑱繁音歌白紵銀燈綺宴出紅妝去來明月
滿金塘

魏際瑞原名祥字善伯寧都人有伯子詩餘

蝶戀花

小院日高花影轉簾捲玲瓏黛色遙山淺睡起慳慳
晴晝暖牕前一樹桃花滿鏡裏暗憐顏色換芳草
連天遮得相思斷好夢無憑春不管玉驄嘶過垂楊
院

李漁字笠翁蘭谿人

浪淘沙 春暮

柳絮忽飛揚散却春光等閒綠遍舊池塘無數浮萍
遮水面何處流鶯蜂蝶一生活尚戀餘香踏青散

後倦梳妝又是慙慙人病也天氣初長

洪

昇字昉思錢唐人監生有昉思詞二卷四嬋
媚填詞一卷

更漏子 渡瓜洲

暗潮生斜日墜瓜步晚雲初霽離別苦客途難江風
吹暮寒疎窗靜孤幃冷旅夢還家纔醒年少日客
中多好春能幾何

國朝詞綜卷二

國朝詞綜卷二

青浦 王 昶 纂

曹貞吉十一首

支隆求一首

董俞三首

董元愷一首

徐時浚一首

江皋三首

沈鱣一首

葉映榴一首

吳興祚一首

宋學一首

陸世楷二首

鄭俠如一首

袁于令一首

余懷二首

呂師濂一首

陸埜四首

葉大忠一首

毛蕃一首

華袞一首

陳舒一首

宋大麓一首

汪价一首

毛先舒一首

錢曾二首

張潮一首

錢謙一首

袁秣一首

王暉一首

洪雲來一首

王賓二首

陸舜一首

劉梁嵩一首

曹貞吉字升六安邱人順治十七年舉入官禮部

員外郎有珂雪詞二卷

朱竹垞云詞至南宋始工斯言出未有不
大怪者惟寔庵舍人意與余合今就咏物
諸詞觀之心摹手追乃在中仙叔夏公謹
兼出入天游仁近之間北宋自方回美成
外慢詞有此幽細綿麗否 王阮亭云寔
庵不為閨檐靡曼之音而氣韻自勝其淡
手處絕似宋人

玉連環水仙

盈盈似隔紅塵路陳思休賦黃昏不是乍聞香月底
更無尋處 靜掩繡簾朱戶更聽微雨青溪溪畔女
郎祠髮鬢見魂來去

賣花聲 秋夜

風緊紙窗鳴秋氣淒清淡雲籠月未分明雨點疎如
殘夜漏滴到三更 孤枕夢難成怕聽聲聲一天黃
葉雁縱橫搔首自憐霜滿鬢又喚愁生

又丁巳清曉

烟草似愁生綠滿長汀隔牆一一賣花聲十日雨絲
天作劇渲染清明 林外乍啼鶯樓外峯青東風拂
面酒微醒欹帽垂鞭何處去淄淄寒輕

玉樓春 春晚

靡蕪一剪城南路弱絮隨風亂如雨垂鞭常到日斜
時送客每逢腸斷處 悵悵門巷春將暮樹底鶯紅
愁不語畫梁燕子睡方濃落盡香泥却飛去

御街行 和阮亭贈雁

寒蕪極目連三楚雁陣驚相語一聲長笛出高樓渺
渺斷雲天暮江深月黑霜寒人靜獨自啣蘆去 遙
峯恰是衡陽數寂寞瀟湘雨無端孤客最先聞嘹唳
亂帆南浦隻影橫空相逢何處紅蓼洲邊路

惜花華牽牛花

河鼓星高繞莓牆幾點野花開了不近夕陽橫斜曉
風吹老依稀過雨長天誰脫下柴窰新稿杯小縱金
盤露濃承來些少 耐肯伴紅蓼只深描淺畫把秋
容妝好偷剪碧霞疑倩七襄人巧佳期約略填橋望
翠輶欲來波渺更悄認籬邊暗螢相照

掃花游 春雲用宋人韻

元宵過也看春色靡蕪澹烟平楚溼雲萬縷又輕陰
作暈綿飄絮舞一夜梅花暗落西牕似雨飄搖去試
問逐風歸到何處 燈事纔幾許記流水鈿車畫橋
爭路蘭房列俎嘆薜華易擲鬢絲堆素擁斷關山知
有離人獨苦漫凝竚聽寒城數聲譙鼓

解語花

伯勞偷喚纔理晨妝小立東風徑綠陰深靚苔痕溼
羅襪一鈎清冷遲迴不定喜蝶粉花光相映生憎他
倒暈明霞漏洩驚鴻影 百褶繡裙廝稱似天風吹
墮露桃仙井冶游暗省銷凝處怕惹離魂難靜流輝
耿耿任撲蕪亂紅飛暝帶滿身香氣歸來向枕邊猶
剩

珍珠簾

雕房幾曲桐陰裏金塘側第一傾城姝麗髮髻照人
明學遠山螺髻蟬影花光相撩亂襯一片芭蕉濃翠
清綺更珊鈎遲押冷波橫地 疑是月底初逢被冰
輪掩映織綃情思宛轉翫瓊顏倩曉風吹起人在銀
河清淺處倚白玉欄杆如水心醉想道書慵把幽懷
旖旎

水龍吟 白蓮

平湖烟水微茫箇人彷彿橫塘住碧雲乍起羽衣初
試靚妝楚楚露下三更月明千里悄無尋處想蘆花
蘋葉空濛一色迷玉井峯頭路 莫是苧蘿未嫁曳
明璫若耶歸去游仙夢杳瑤天笙鶴凌波微步宿鷺
飛來依稀難認風吹一縷泛木蘭舟小輕綃掩映問

誰家女

柳色黃對雨和竹垞

柳絮為萍梅子漸黃天氣如許溪雲乍起遮山釀做
幾絲微雨東西不定搖曳淡霧輕烟荷錢一一跳珠
露庭樹碧參差蔭青苔無數平楚斷塘遙指如髮
秧針綠迷南浦暗想空江軋軋唯聞柔櫓亂紅無影
寂寞靜掩疎籬銅街溼糝香塵路倩斗帳高眠小牕
邊聽去

支隆求字武侯嘉善人順治十七年舉人官沂水

縣知縣有泊庵集詞附

菩薩蠻

空濛雨後晴巒曉懸岩上下行人少香冷撲生衣落
花隨處飛青峯看點點樹影參差掩古刹隱中林
暮鐘林外深

董俞字蒼水江南華亭人順治十七年舉人有

盟鷗草閣詞三卷

彭羨門云蒼水情詞兼勝小令尤工

菩薩蠻

草堂人去烟光夕藕花殘雨銀塘碧蝶夢此時幽蟬
吟一院秋庭梧飄玉砌曲磴茶烟細獨坐數歸禽

疎鐘度遠林

又懷友

去年元夕和君別今年又見梅如雪寒雁一聲聲君
從何處聽愁來渾似醉千里同憔悴烟艇暮江寒
誰憐行路難

山花子

脈脈柔情怯曉風茜裙雙帶綰芙蓉僻徑遇人羞背
立柳陰中幾度暗顰眉黛綠一回微笑粉痕紅願
作翠堤芳草軟襯鞋弓

董元愷字舜民長洲人順治十七年舉人有蒼梧

詞一卷

尤展成云舜民以名孝廉忽遭註誤侘傺
不自得故激昂哀感悉寓于詞

如夢令

枝上啼鴉如訴喚起離愁無數曲徑古雲深隔斷夢
中來路回顧回顧月約花陰西度

徐時浚字仲宣清江人順治十七年舉人

河滿子

暮色空濛一碧颯然小雨纔過水榭涼潭三萬頃烟
中不斷菱歌何處好風陣陣綠香早汎新荷搔首

青天試問閒來徙倚庭柯峽口月輪弦欲滿今宵枕
簟涼多小飲自消良夜航船并吸銀河

江

皋字在涓桐城人順治十八年進士官至平

慶道有染香詞一卷

生查子

殘漏擁青綾好夢偏隨枕如水注春愁難汲深深井
花落小桃紅池面波生錦曉起步芳叢滴露和香
粉

卜算子 曉行

懸空月半鉤影落烏栖樹曉露如珠的的圓溼透征
衫處 衝烟聞馬嘶隔水驚人語望裏遙山無數青
遮住還家路

江神子 秋柳

幾株疎樹近斜陽弄烟光漾橫塘最是西風南浦路
淒涼樓上凝妝人不見春夢裏影微茫 繫人愁處
萬絲長絮飛狂燕飛忙記得門前曾控紫駟韁此日
腰肢難鬥舞消瘦盡不堪量

沈

鱗字木門嘉興人順治十八年進士官安寧

州知州

沁園春 春眉

新月留痕曉山橫黛宮樣堪傳想卓女爐頭依然嫵媚唐姬圖裏猶見清妍未語先顰欲歌還鎖暗託芳心舞扇邊銷魂處有鵝黃初柳學畫雙尖斜分八字天然筭贏得風流京兆憐更離筵斜倚輕羅常搵午窗倦繡綵筆重添鈿小偏青春深易逗瞥見閒愁此際占歸應喜想不須鏡裏待掃燈前

葉映榴

字炳霞上海人順治十八年進士官湖廣參議死夏包子難贈工部侍郎諡忠節有

蒼岩山房遺稿詞附

金菊對芙蓉九月十七日賞菊

風折疎籬雨荒叢菊重陽節物全非更心旌南北馬首東西悲秋老矣還添恨恨征人不共秋歸登高再約曉山依舊低畫修眉傲霜未過花時認斜陽老圃瘦影參差恰白衣人對綠酒盈卮田園蕪去思彭澤奈歸來三徑偏遲香橙乍破瘦螯閒把一醉題詩

吳興祚

字伯成奉天人官至兩廣總督加兵部尚

書

踏莎美人送顧梁汾之江右

月暗山城香疎桂樹征帆遙指霞飛處黃雞白酒擬相招試問君能回首一停橈蓼渚看花蘆洲聽雨

高吟莫作悲秋語西風落葉捲江潮從此相思都在灞陵橋

宋

聿字牧仲商邱人以蔭官至吏部尚書有楓

香詞一卷

柳梢青 早春

何事淹留朝來春色又遍皇州綺陌燒燈鳳城挑菜
吹面風柔 招尋漫逐鳴騶回首處傷心舊游燕子
穿簾杏花倚檻小小紅樓

陸世楷

字英一平湖人順治間貢生官南雄府知府有種玉亭詞一卷踞勝臺詞一卷

清平樂 村居

三間茅屋屋後蕭蕭竹更喜柴門臨水曲隔岸柳絲
垂綠 午餘一枕匡牀醒來牕外斜陽犢子驅過短
堰鵝兒浴起方塘

綺羅香 春草

河畔波平山頭燒淨石髮沙痕齊吐一色萋萋遮斷
天涯歸路清夢杳謝客西堂別魂黯江郎南浦望遙
空碧映蒲帆離人時在綠楊渡 倩誰傳語故國留
取蘼蕪徑裏莫嫌遲暮客舍蒙茸只有青袍如故正
芳時女伴同尋問舊日王孫何處縱裙腰繫得東風

泊聞鷓鴣語

鄭俠如字士介江都人官工部司務有休園詩餘

一卷

浣溪沙 詠梅

洗盡鉛華獨淡妝孤情偏愛水雲鄉恥同桃李媚春
光已托焦桐傳密意更邀明月伴幽香一枝寒玉
倚橫塘

袁于令初名韞玉字令昭吳縣人官荊州府知府

浣溪沙

郭外紅橋半酒家柳陰陰下有停車笙歌隱隱小牕
紗曲水已無黃篋舫夕陽何處玉鈎斜綠荷開徧
舊時花

余 懷字無懷莆田人有秋雪詞一卷

吳梅村云澹心詞大要本於放翁而藻豔
輕俊又得之梅溪竹山

浣溪沙 蕪城感舊

燕子卸春入畫橈蜀岡楊柳拂西橋隋家宮殿久湮
銷綠酒細斟人脈脈紅簾吹送影迢迢莫愁雙槳
帶江潮

憶秦娥

蛾眉淡芙蓉映日秋將半秋將半畫樓微醉鶯兒聲
喚小橋日日嬌癡慣甚無情緒心腸亂心腸亂慵
拈針線拋殘絃管

呂師濂字黍字山陰人有守齋詞一卷

王阮亭云呂子故明太傅文安公會孫游
于滇爲上客善書亦不依古法古文滔莽
雄渾填詞峭雅而旨豔

蘇幕遮 新秋用周美成韻

燕將歸鱸尚小初拂金風桐葉辭柯少撲上羅衣涼
帶峭忽換蟬聲秋覺空山早 玉繩低香霧裊笑指
銀河預引天孫到雨過沉沉蓮漏杳相簾桃笙一夢
天忘曉

陸 埜 字我謀平湖人有曠莽詞一卷

彭羨門云曠庵年來濩落不偶所作長短
調及和漱玉詞若有所寄託而云然者其
詞妍雅綿麗頗與北宋名家風格相似

如夢令

曉起東風何驟情緒渾如中酒幾度待新春底事惱
人依舊歸否歸否羞見鏡中人瘦
相見歡

碧桃落盡前溪杜鵑啼不喚離人歸也喚春歸 非
干病不關醉是思伊幾度夢中相見又還非

青玉案

朱藤碧草南園路早樓外斜陽暮當日橋邊曾一顧
微波頻送輕羅徐舉總是相憐處 追思往事都成
誤又聽黃鸝送春去淚灑花梢渾似雨柔情流水佳
期飛絮空把年華度

醉花陰

細雨輕風花滿路望斷人歸處斜月又黃昏獨卷湘
簾燕子雙雙度 玉簫錦瑟情難訴總為多情誤生
怕是三春愁共春來不共春歸去

葉大忠字向日江南華亭人有浪鷗萍草一卷詞

附

黃金縷 送春

陌上垂楊千萬縷縈罵東風絆得春無主滿目山川
聞杜宇落紅陣陣催飛絮 兩兩黃鸝相對語一度
韶光瞬息看如許把酒問春春不語樓頭一夜瀟瀟
雨

毛蕃嘉善人貢生

如夢令

楊柳枝頭疎雨又是蘆花飛絮白露下庭除冷透畫
梁深處愁緒愁緒燕子啣將歸去

華

衮字龍眉江都人

王阮亭云龍眉廣陵詩人其詞清婉彷彿
竹屋蘆川

臨江仙 夏景

十里芰荷香暗送槐陰池館涼生白團小扇惹風輕
碧紗人靜悄花氣壓釵橫 又是黃昏新月上銀箏
斜抱閒行空庭彈出斷腸聲流螢飛四壁清漏徹三
更

陳

舒字原舒江寧人流寓嘉定有道山詩鈔二

卷詞附

蝶戀花 紀夢

試夾羅衣寒尚悄紫霧團烟月在藤花曉推枕起來
還睡倒欲尋去夢程多少 綠水春塘行遍了山遠
斜陽一碧圍芳草待喚吟魂天杳杳醒來人與春同
老

宋

大麓字舜納江南華亭人

虞美人 雨夜

真珠萬點隨風起滴碎芭蕉裏一重簾幙一重愁又

是紗牕香散悄寒收
情人常傍高樓立樓下榴花
濕可憐幽夢爲誰長
記得挑燈絮語費思量

汪 价字三儂嘉定人諸生有半舫詞一卷

踏莎行 初秋

岸柳絲黃井梧葉冷蘋花漸老荷花暝雲天漠漠
秋陰斷霞殘照無憑準
風咽蟬聲雨低螢影莎庭
露坐人孤另
筭來衾枕一般愁
秋宵更比春宵永

毛先舒 字稚黃錢塘人有平遠樓外集一卷鸞情

詞一卷

滿江紅 暮春柳

一片殘陽映幾處河橋晴色問當日征衫別淚爲誰
沾濕暮雨半梳魂欲斷綠陰如幄愁無極減風流不
似門腰支初相識
章臺路春狼籍灑水岸烟斜織
盼香塵依舊鈿車金勒飛絮影隨風上下離人望斷
江南北怕重來剩有亂蟬嘶千條碧

錢 曾字遵王常熟人

鵲橋仙

輕勻粉面斜梳蟬鬢小閣妝成獨坐東風幾陣漾簾
鉤卷無數楊花飛過
閒庭草綠紗牕人靜只有燕
兒和我暗將春恨數從頭
恰恰被鶯聲啼破

江城子

百勞啼徧小闌干蝶飛還夢初殘人在綺羅香裏度
輕寒牕外海棠開也未朝雨歇卷簾看杏梁春暖
燕泥乾倚屏山思漫漫拖取柳條殘恨上眉端羞整
翠鈿無箇事空對鏡惜朱顏

張

潮字山來新安人有花影詞一卷

浣溪沙

曉妝

日影罨眉罷曉眠蝦鬚簾捲嫩涼偏工夫拚得費周
旋玉腕半擡釵上裏星眸頻轉鏡中傳妝成應得
箇人憐

錢

嫌字介子嘉善人

昭君怨

簌簌風敲簾箔庭角梧桐愁落花影半窗橫月三更
金鴨微微香冷半睡又還驚醒無賴數聲鐘小牆
東

袁

秣字丹六嘉興人

蝶戀花

鞦韆牆外紅橋畔香徑籠雲零落桃花片一點芳心
如絮亂繡牀斜倚慵添線拾翠重來尋女伴笑摘
櫻桃簾底彈新燕頻約鴉鬟釵更顛輕綃微露雙金

釗

王 暉 初名棐字丹麓仁和人諸生有峽流詞一

卷

施愚山云詞貴清空不尚質實丹麓詞在
清空質實之間

春光好 春游即事

催夢醒鳥聲柔喚人游烟外垂楊綠影浮雨初收
似趁東風吹去穿花漸近高樓翠幙忽寒人面露惹
春愁

洪雲來字茂公錢塘人

菩薩蠻 閨怨

春風吹淡眉梢翠新妝慵向菱花試樓上望征鴻雲
山千萬重 無言珠淚滴盡日闌干側諱道不相思
如何夢又知

王 賓 字仔園江都人康熙二年舉人

祝英臺近

咽蟬風飄鶴露寂寞紫蘭渡指點繁華歌吹竹西路
孤鴻一點飛來數聲蘆管好迸入晚烟催暮 凭闌
處卻笑明月無端偏向玉鈎住垂柳千絲糝作半城
霧年年慣自悲秋幾回搔首怎便忍送將秋去

江城子清瑛

落花流水板橋西
遠邨迷野烟低
青塚茫茫滴酒印
紅泥還問從前忙
底事人不見
草萋萋
白楊搖曳
不勝悲
紙錢飛
杜鵑啼
年去年來埋沒盡
芳菲一帶
斜曛歸路晚
風料峭怯寒衣

陸

舜字吳州泰州人康熙三年進士

好事近巡海過飛雲渡

橫海下戈船
信宿珠崖消息
試向玉環山外探
一絲風色
桃花春汛
島門寒寂寞
老龍窟
閒倚射潮犀
弩聽枕樓吹笛

劉梁嵩字玉少江都人康熙三年進士

浣溪沙紅橋卽事同阮亭作

綠樹陰濃露酒家
小廊迴合引停車
銀箏嬌倚杏兒
紗水調歌頭
聲未了
曲闌干
外月光斜
聲聲渡口
賣荷花

國朝詞綜卷三

王

國姓

...

...

...

...

...

...

...

...

...

...

...

...

國朝詞綜卷四

青浦 王昶 纂

吳綺八首

曹寅一首

高士奇二首

丁燁六首

丁燁二首

宋泰淵三首

宋思玉一首

華胥三首

呂洪烈二首

佟國鼎一首

佟國器一首

佟國璵一首

佟世南十首

王士禛一首

顧湄一首

許旭一首

潘高一首

鄒宏志五首

周綸二首

秦保寅一首

吳

綺字蘭次江都人由選貢生官湖州府知府

有執香詞一卷

四庫全書提要云吳綺詩餘頗擅名有紅

豆詞入之號以所作有把酒囑東風種出

雙紅豆句也跌宕風流亦可謂一時才士

矣朱竹垞云蘭次之詞選調寓聲各有

旨趣其和平雅麗處絕似陳西麓

點絳脣春情

國朝詞綜卷四

中華書局聚

幾度鸞啼垂楊綠了千千縷玉驄人去滴盡西窗雨
瘦損菱花金粉都無緒相思處無情雲樹遮却多情路

又詠蟬

素綉高嘶半生贏得風和露槐朝柳暮占斷青青樹
抱葉吟條似向行人訴愁無數不堪聽處六代斜陽路

謁金門 雨後

朝雨沐小閣翠陰如幄閣外白雲飛去速亂峯隨意
綠靈鷲喜聲相續新笋看看成竹滿逕落紅無管束燕兒啣補屋

南歌子 閨情

銀甲調新火珠簾捲曉霞辟寒初着杏紅紗正是惱
人時節不歸家鶯坐渾身柳蜂歸兩股花一絃春怨語琵琶昨日鴛鴦買卦又須差

釵頭鳳 冬閨

燈花滴爐香熄屏風靜掩遙山碧簫誰弄衾長空五
更簾幙月和霜重凍凍凍閒尋覓無消息淚痕冰惹紅綿濕愁難送情還種巫雲昨夜同騎雙鳳夢夢

夢

兩同心新燕和宗梅岑

舞煞東風一春無盡恨芹泥未穩雲廊見柳絮才經
露井怎不記王謝堂前夕陽紅冷 小院窗紗綠靜
翩翻自引喜雙雙翦股花分憶兩兩釵梁玉並更誰
知漢殿留仙那人孤影

鳳凰臺上憶吹簫和漱玉詞

鏡翠封奩爐香減篆晚山青上眉頭記燈邊題扇花
底藏鈎寂寞蕭闌人遠千萬事總合長休無聊是早
春天氣心緒如秋 羞羞玉臺孤影便夢入巫陽好
更難留想紫簫吹共袖倚紅樓當日畫闌楊柳曾親
見兩地情眸而今也閒庭萱草不解銷愁

東風第一枝樓賢看梅和龔芝麓

螺碧遙峯鵝黃新水大堤煙草初暝紫駟斜裊金鞭
十里笑花風淺脂清粉淡抵多少夢雲纖軟只容他
雙鶴棲遲不許美人鶯燕 凝睇處雪迷詩眼坐久
地香吹酒面漫誇點額含章那數綵林隋苑金樽檀
板逗春心串搖珠線問此時隴上參差可似何郎重
見

曹寅字子清奉天人官至通政使有棟亭詞一

卷

洞仙歌三屯道上題龍女廟

層巒傳翠盤曲遮行旅野廟荒涼春不住統平林只
有千尺游絲縈晚絮鳩婦陰陰呼雨月明辭碧海
一墮紅塵銷盡人間幾寒暑別淚灑鮫珠回首孤城
澹烟冷照傷心處都莫管興亡事如何但助我乘風
一鞭東去

高士奇

字澹人錢塘人一統志作平湖人以諸生
供奉內廷官至禮部侍郎謚文恪有蔬
香詞一卷竹窗詞一卷

雙調望江南

堪憶處牆繞院西樓紅樹窗前花鬪錦碧天簾外月
如鉤時序又新秋消瘦了減卻舊風流閒摘珠蘭
供晚浴為開茉莉更梳頭同坐看牽牛

蘇幕遮春閨

陌柳長池波皺年去年來只有春依舊怕理羅衫寒
欲逗雨雨風風做出清明候糝蘼蕪函豈蔻一種
閒情慣惹人消瘦忽憶花陰初見後半晌無言只把
鴛鴦繡

丁

煒字澹汝德化人由漳平教授官至湖北按

察使有紫雲詞一卷

朱竹垞云雁水構壁園於官廨與往來賓
客倚聲酬和所成紫雲詞流播南北蓋兼
宋元人之長

鬢雲鬆曉起

碧幃深綃被暖到枕流鶯只向夢中喚日映湘屏宮
錦燦簾外遙山一抹烟鬟亂倒紅螺遺翠鈿昨夜
歌喉纍纍珠成串滿院綠陰人不見風颭柔紅隱約
桃花面

杏花天寒食郊行

柳烟梨雪東風晚巡繡陌曉寒乍淺草香泥潤金羈
緩隔水賣錫聲喚春欲去游絲難罨聽軟語無聊
鶯燕飛紅暗綠誰庭院人試輕衫小扇

碧窗夢春夜

蓮漏催蟾影梨雲妬蠟明銀箏低訴可憐情不道翠
幃風細有人聽

醉桃源

秋日蘭次觀莊招諸同人集會波閣待
月

榕陰覆水弄新晴涼飈蘋末生殷勤勸客換犀觥蟾
華今夜明珠箔卷縹紋平沿池藻影橫一分秋作
十分清人如月有情

連理枝

舍第過訪藺次寓留酌余未及與席上
同賦此詞見憶倚聲和答

珍做宋版印

曲榭秋陰淨碧沼開妝鏡席共看雲屐疎舊雨難消
清興想多情陶令幾停樽又夕陽催暝鴈過西風
冷閒倚梧桐影竹下人歸花間句好偏愁獨醒待蠻
牋約就醉蘭茗掃蓬門苔徑

青玉案

舟夜得黃用錫書問寄答

蘭橈拍浪浮烟浦正日晚相思處搖落江籬傷歲暮
故鄉亭榭舊時樽俎都入離人句生涯日趁閒鷗
鷺認水驛沙村頻來去明滅漁燈風外吐愁邊心事
夢中歸路滴碎孤篷雨

丁

焯字韜汝德化人有滄霞詞

瀟瀟雨落葉

疎林千樹脫露秋山淺黛出寒隄倩枯黃病紫殘紅
瘦碧合造幽淒語月敲風不定暗和峽猿啼撲簌沙
鷗背驚夢難棲何處吟情最苦在夕陽樓北流水
橋西記綠陰深鬧鶯屐此會攜數年華飄零爛錦但
紛鋪霜徑短筇迷銷凝候邨烟暝報午時雞

杏花天寒食郊行

玉驄嘶斷斜陽晚漸踏遍裙腰草淺賣花聲過西樓

緩不見隔簾人喚 垂柳外秋千還罨但剗地香泥
掠燕新烟籠燭迴深院低裊雀屏畫扇

宋秦淵字河宗江南華亭人有棣萼軒唱和春夏
詞一卷

鎖窗寒 春晚

綠暗天涯單衣初試閒窗寒少柳浪陰陰留得鶯聲
低巧亂紅零落拂空階暗香葉底猶繚繞正日長人
靜博山烟燼餘烟微裊 悄悄倚欄處珍珠簾不捲
銀屏晝皎情懷困倦漸有睡情相惱奈東風剗地輕
吹半枕華胥殘醉小乍凝眸一樹桐花搖影弄殘照
千秋歲 春暮卽事

天淨沙

夢回翠幙香殘春寒惻惻衾單強起雕簷日淺庭花
開遍無言獨倚闌干

宋思玉字楚鴻江南華亭人有棣萼唱和詞三卷

王阮亭云楚鴻詞警語層出去宋人未遠

點絳脣

夢冷魂消杜鵑啼血春心苦一天風雨春去人無主
涼滿蒼苔燕子簾前舞誰私語爐煙繞處縈結愁
千縷

華

胥字義逸無錫人有畫餘譜一卷

魏叔子云義逸工畫嘗見所繪人物間麗
婉雅宜其于詩餘學而輒工也

婦人嬌贈妓同周雪客王衣尚賦

黛色嵐輕粉痕潮淺驪燕尾綠雲雙剪炭獸爐邊雪
猊簾畔任顧曲吹笙泥他柔煖曉閣曹騰晚香零
亂還絮語玉釵恩怨算月盈虧移家近遠待繡戶春
風笑桃人面

宴清都嘉禾遇曹希文同武原下榻書巢

不減冶遊興韶光在霏微絮亂煙暝秦駐花殷由拳
浪軟去留難定尋了熟鷺馴鷗許重過書巢鶴艇悵
春歸啼鳥都稀筠簾晝長人靜更看碧宇澄空海
津塵遠風岫霞冷年時賦別江郎夢老鬢花猶剩故
園已隔三霜拚到處清尊醉醒還凝竚萬綠芳叢一
蟾素影

啓扉筠怕尖風零雨愁絕倚欄人翠袂籠寒粉容倦
晝淚眸依舊傷春相憐處雙鬟移照篝影暗曾誤濕
仙裙冷豔啼蜚晴嬌舞舞蝶總是銷魂誰料蘋波乍
起奈山齋秋寂幾度逡巡嬾向粧樓偏留苔徑依徊
簾底溫存任參差輕盈低亞逗疎螢藻井又黃昏能
共蘭蓀結佩惆悵芳辰

呂洪烈字清卿山陰人有藥庵詞一卷

桃源憶故人月夜

梧桐露滴水輪洗小院清如秋水萬籟無聲靜裏絡
緯吟初起芙蓉影浸橫塘底窄地金風襲體一點
愁心難寄搗就寒衣未

蘇幕遮 秋日限韻

袷衣單紈扇小瀟灑花陰祗覺流螢少獨上層樓幽
徑峭迴望長空鴈字來何早水痕收山帶裊迢遞
鄉關夢去何時到涼月微明銀漢杳鷺地寒生愁對
疎星曉

佟國鼎字懷東滿洲正藍旗人官佐領

望江南 宿宣和古廟卽事

覓宿處落日映山紅百尺松濤吹晚浪幾枝樟蔭掛
秋風歸夢繞關東

佟國器字匯白漢軍正藍旗人貢生官至浙江巡撫

酷相思石頭城懷古

百尺高臺臨鶴渚凭弔悲今古看滾滾長江無曉暮
前代也東流去後代也東流去朱雀橋邊芳草路
幾遍風和雨問佳麗六朝遺恨處鶯語也如相訴燕
語也如相訴

佟國璵字碧枚滿洲人

浣溪沙閨思

午倦慵將繡帖移却揜朱袖捲簾幃枝頭已有嫩鶯
啼薄倖客遊芳草路相思人在落花時暮雲樓外
遠山迷

佟世南字梅岑滿洲人

曹秋岳云東白詞纏綿婉約當與柳屯田
秦淮海爭長

望江南閨情

閒倚檻螺翠淡眉尖滿院落花春晝靜一窗疎雨暮
寒添不病也懨懨

點絳脣

憶昔芳時花間曾綰同心結飛飛蝴蝶細草輕烟抹

何事而今樓迥人難接愁千疊玉釵敲折一枕殘
更月

謁金門 春感

春寂寂人似曉風無力露濕殘花飛不得滿堦紅淚
滴 驕馬未回空磧芳草又生南陌十二闌干和恨
立日斜山影直

阮郎歸

杏花疎雨灑香堤高樓簾幙垂遠山映水夕陽低春
愁壓翠眉 芳草句碧雲辭低徊閒自思流鶯枝上
不曾啼知人腸斷時

山花子

芳信無由覓彩鸞人間天上見應難瑤瑟暗縈珠淚
滿不堪彈 枕上彩雲巫岫隔樓頭微雨杏花寒誰
在暮煙殘照裏倚闌干

浪淘沙

相望隔重闌兩地消魂青山千疊鎖寒雲夢去夢來
遮不住幾個黃昏 柳葉展眉顰鶯燕紛紛不晴不
雨奈何春盡道養花天氣好惱殺離人

小重山 同諸子集王綏山蛛隱亭

日暖池塘春草齊杜鵑花影外杜鵑啼小亭西畔夕

陽低新雨過山翠欲沾衣
滿眼舊相知客邊重此
會倒金卮更闌莫惜醉如泥
東風裏千點落花飛

天仙子

隱隱青山濛碧霧小艇但隨流水去
荒村何處問桃花芳草渡斜陽暮
一片紅雲遮去路偏怪東風吹
不住點點胭脂飄細雨人家疑在
武陵源花亂舞鶯亂語只恐劉郎
來又悞

畫屏秋色感舊

獨自倚闌角嘆病起滿眼秋光蕭索
塞鴈初來天長地遠錦書難託
此際縱相逢已悞了西樓舊約那更
腰肢如削鎮長日多愁梧桐墜漸
漸西風做冷越羅難著飄泊非關
情薄被巫峽雨雲迷却翡翠香銷
胭脂紅淡相思都錯往事不堪提
正少年輪他行樂日晚自開簾
幙江上望歸舟但見夕陽照處
滾滾寒潮初落

蘭陵王詠柳贈別和周美成韻

雨絲直弱柳陰陰籠碧長堤外芳草夕陽一派迷離
暮烟色春風到故國慣送天涯行客柔條短不繫玉
驄何似遊絲裊千尺追思舊蹤蹟正翠拂珠樓絮
舞瑤席鞦韆院落逢寒食恨回首人遠夢來相覓飛

花撩亂滿古驛又爭認南北
悲惻恨凝積問何處
啼鶯深夜寥寂春江渺渺
情何極奈曲裏哀怨又生
羌笛枝頭清露似伴我淚珠滴

王士禛字禮吉山東新城人貢生

菩薩蠻過露筋詞

女郎遺蹟秦郵路晚涼門外青楓樹石竹響空祠蕭蕭
蕭三兩枝可憐嗚咽水斜日西風裏何處感人情
估船聞笛聲

顧湄字伊人太倉人

滿江紅錫山遇蘇崑生話舊次韻

曲罷峯青誰簌簌淚珠拋豆是當日征南殘客柳生
蘇叟檄下通侯髯奮戟詩成學士胸羅斗到而今淪
落只龜年餘存否廣場月猶挂口蕭寺雨重攜手
任臺傾戲馬塘空走狗慷慨休歌燕市筑逡巡且醉
龍山酒奈白頭一闋授紅紅春風又

許旭字九日太倉人諸生

孤鸞榕署冬日見梅

江南姿格三月初間開來盡白淡掃蛾眉妝就鏡臺
新額東皇不加拘管任狂蹤亂尋游屐把酒空山野
店聽一聲羌笛奈故園何處關山隔早臘盡天南

難問消息况在重門裏更怎生知得忽見一枝折到
道那邊十分狼籍不信天涯如夢看青衫沾溼

潘 高字孟升金壇人有南村詞一卷

漢宮春

雨笠烟蓑挂輕帆何處徧臥春湖晚來卻看西渡雲
水模糊江天欲雪認前年沽酒邨墟頻問訊扁舟消
息當時蝦菜如何 可惜一場風月論呼鶯戲馬更
有人無如今故交落落昔夢疎疎雞豚近局也時時
子弟肩輿為報道山翁老卻江湖豪氣全除

鄒宏志 字念尊吳江人有邀月詞一卷

尤展成云具區今之孝子也殺賊守城馳
名天下且又工於小詞字字香豔

望江南

江南好春到柳吹綿浴繭風輕調鶴地焙茶煙暗賣
錫天無事日如年

又

江南好銷夏儘風流淨掃煙窗烹雀舌平鋪冰簟剝

雞頭新竹響颼颼

又

江南好秋老拾松釵擁几堆盤誇佛手沿籬綻菊號

僧鞋却稱坐幽齋

又

江南好冬暖愛農家村店板橋饒竹葉紙窗茅屋種
梅花枯樹亂棲鴉

蝶戀花

初夏村居

村徑斜穿饒笋蕨淺立牆陰剛是春游歇竹杖芒鞋
閒打迭廉纖雨滯苔堦滑綠膩一池梅水咽猶喜
浮萍替得楊花活煮酒欲嘗浮蟻結小梅試摘牙酸
徹

周

綸字鷹垂江南華亭人貢生官國子監學正
有柯齋詩餘一卷

望江南

門晝掩臨鏡問花枝風若有情吹不去月應無意照
來遲徧爲惹相思

洛如怨

寂寞舊時池館人共落花吹散繫馬畫橋邊恨綿綿
心事倩誰堪管忘卻春風一半沾酒醉還眠夕陽
天

秦保寅字樂天無錫人

風流子和留仙

當年人隱約桃花路青鳥信悠悠想敲斷玉釵丁香
緘恨渡來銀漢豈惹含愁如今見華燈催按曲斜日
看梳頭着意矜持低鬟輕笑自然風度無語凝眸
素娥橋下路歸時應不忘曲院重樓更記酒闌調瑟
燭暗深鉤怕橫塘夢斷錦書難托山香舞罷翠鈿誰
收待到梅花如雪一半春休

國朝詞綜卷四

國朝詞綜卷五

顧貞觀十五首

青浦 王昶 纂

何鼎二首

錢芳標八首

陳玉璫一首

張英一首

何龍文一首

汪懋麟一首

徐乾學一首

宮夢仁一首

李振裕一首

王士禛一首

錢霞一首

葉燮一首

徐倬一首

曹鑑平一首

王燮一首

王鴻緒一首

汪鶴孫一首

馬鳴鑾一首

顧貞觀 字華峯 號梁汾 無錫人 康熙五年舉人 官

國史院典籍 有彈指詞三卷

杜紫綸云 彈指詞極情之至 出入南北兩

宋而奄有衆長

浣溪沙 梅

物外幽情世外姿 凍雲深護最高枝 小樓風月獨醒

時 一片冷香惟有夢 十分清瘦更無詩 待他移影

說相思

歸國遙

舒玉腕鬪草昨羸纏臂換明日前裙誰伴問他佯不
管幾疊纔開羅扇莫教題字滿空却回文一半有
人親落款

南鄉子 擣衣

嘹唳夜鴻鳴葉滿階除欲二更一派西風吹不斷秋
聲中有深閨萬里情 廊上月華清廊下霜花結漸
成今夜戍樓歸夢裏分明人在迴廊曲處迎

柳初新 水仙祠下柳

南朝一片傷心雨總被垂垂留住水村山郭紅橋倚
徧極目亂飄金縷能有春情幾許怕重來撲天飛絮
當日別離無據知他可憶長亭語零鈴唱罷酒醒
殘月只在踏青歸處添得倚風凝竚念天涯有人羈
旅

雙雙燕 用史邦卿韻

單衣小立正秋雨槐花鬢絲吹冷屏山幾曲猶憶畫
眉人並殘葉暗飄金井問燕子歸期未定傷心社日
辭巢不是隔年雙影 碧甃生憐苔潤伴欲折垂條
越加輕俊爲他縈繫絮語一簾煙暝容易雕梁占穩
待二十四番風信重來喚取疎狂半刻玉肩偷凭

百字令

冷清清地便懽場也只不情不緒况是鬢絲禪榻畔
禁得幾番秋雨蘭炷微沉桃笙半疊瘦盡爐煙縷香
深醉淺此愁何減羈旅 不過絮斷柔腸亂蛩多事
切切空堦語二十五聲清漏永渾是碎人心處翠濕
雲鬟涼侵雪腕莫更催機杼知他睡否慢憐別夢無
據

一絡索

推枕依然似昨鬢香雲閣欲擡雙眼尚瞢騰記夢語
無端錯 何處一聲催覺曉鶯簾幙眠時親手繫花
鈴又徹夜風吹薄

眼兒媚

手捲湘簾雨初收雙燕小紅樓釀花天氣護花心性
一樣溫柔 知他底事長無語鈿帶縛笙篴箇中須
解寒應勝暖春不如秋

采桑子

秋來看盡星河也只是孤眠多謝燁娟再放山樓一
夕圓 牀頭瀾響渾疑雨滴破蒼煙小字香箋伴過
泠泠徹夜泉

木蘭花慢 憩孔雀庵其旁爲馬湘蘭故居

數鳴珂舊曲誰第一擅歡場有燕骨千金楚魂九畹
姓字餘香秦淮尚流膩粉奈溫柔改署白雲鄉碎玉
一聲何處迢遙銀漢紅牆湘蘭理鬢墜一寶釵徐語
侍兒曰久不聞碎玉聲矣
散花親許嫁王昌半偈
宿緣償任長板橋頭夜深清唄別是淒涼鄰庵漫題
孔雀更難尋三十六鴛鴦對此莊嚴妙相從他惱亂
愁腸

真珠簾

櫻桃宴罷人歸後正煙籠澹月疎窗如晝紅藥闌邊
當日親攜素手睡起微聞花歎息賸一縷相思誰剖
依舊對漂香泊粉幾枝春瘦 別久心期輕負為深
隣痛惜越添憊憊十載綺羅情付昨宵殘酒誰道酒
醒都是恨只剗地曉風楊柳知否古今來一例斷腸
回首

金縷曲 秋暮登雨花臺

此恨君知否問何年香消南國美人黃土結綺新妝
看未竟莫報諸軍飛渡待領略傾城一顧若使金甌
常怕缺縱繁華千載成虛負瓊樹曲倩誰譜 重來
庾信哀難訴是耶非烏衣朱雀舊時門戶如此江山
剛換得才子幾篇詞賦弔不盡人間今古試上雨花

臺上望但寒烟衰草秋無數聽嘹唳雁行度

百字令 荆溪兩泊用史梅溪韻留別陳其年史
蝶庵諸同學

花前鬢影被東風吹上一絲絲白算只浮家堪位置
第一飄零詞客果擲迷香鞭遺軟繡彈指成遙隔茶
烟篷底看炊蟹眼如雪 錯道舊雨無情佳時却恁
誤了鶯和蝶僕本多愁消不起罨畫溪山風月蝦籠
箏船蛟橋酒幔麗景從消歇津亭回首嫩條誰與同
折

賀新郎 寄吳漢槎寧古塔以詞代書

季子平安否便歸來生平萬事那堪回首行路悠悠
誰慰藉母老家貧子幼記不起從前杯酒鱸魁擇人
應見慣料輸他覆雨翻雲手冰與雪周旋久 淚痕
莫滴牛衣透數天涯依然骨肉幾家能勾比似紅顏
多薄命更不如今還有只絕塞苦寒難受廿載包胥
承一諾盼烏頭馬角終相救置此札君懷袖

又

我亦飄零久十年來深恩負盡死生師友宿昔齊名
非忝竊試看杜陵消瘦曾不減夜郎儻愆薄命長辭
知己別問人生到此淒涼否千萬恨爲兄剖 兄生

辛未我丁丑共些時冰霜摧折早衰蒲柳詞賦從今
須少作留取心魂相守但願得河清人壽歸日急翻
行成稿把空名料理傳身後言不盡觀頓首

錢芳標

字葆劼江南華亭人康熙五年舉人官中

書舍人有湘瑟詞四卷

彭羨門云葆劼居清切之地雍容都雅名
滿海內乃詞名湘瑟若以仲文自况夫曲
終江上句非不工然寥寥十韻何至乞靈
神助以視是編之驚才絕艷大歷才人殆
不免有媿色矣

轉應曲

楊柳楊柳影蘸灞橋別酒平明小雨霏微那更離亭
絮飛飛絮飛絮人與春光俱去

雪獅兒詠貓同錫鬯作

花鬣臥醒又閒趁十二闌邊一雙蝶舞繡倦空閨幾
遍春纖親撫奔騰玉距亂蠅拂紅絲千縷試驗取雙
瞳似線庭陰日午好是蠶時早乳問當年果否共
調鸚鵡入蜡迎來何處遠村巫鼓雲圖錦帶漫搦得
張家遺譜燈明處合對金猊小炷張泌妝樓記云張
搏好貓有雲圖錦帶諸名價值數金又黃尊師善畫

解連環 蘆花玉峯道中偶成

暮江蕭瑟滿汀洲
點綴楚天秋色映一片敗葦枯荷
肯漫學東風柳綿無力雪意垂垂
恰藏箇小船吹簞伴閒漁
露頂宿鷺聯拳一般頭白
宵來緒風漸側捲銀濤
萬點墮岸千尺認空濛
霧雨聲中却蟾影低
篩雁程遙碧憔悴徐娘
悵老去風情非昔記
年年前裙水畔嫩芽乍坼

倦尋芳 和道嵩詠綠蝴蝶

抱枝似葉塗翅非鉛羅片
新剪魄化青陵猶帶隴烟
葱蒨蘚牆低蒲塘淨
羨渠小影無人見
又娟娟逐銜花翡翠戲過閒慢
試飛上鳴蟬薄鬢
碧玉搔頭誰辨真質
一抹裙腰剗地樾陰
尋遍夢去應沾浮蠹甕
撲來偏映乘鸞扇
囑滕王寫入霜綃
黛痕休淺

卜算子

寒食雨和烟染出鵝兒淺
依舊垂垂千萬條
暗把春愁縮
寂寞掩長門
搭向欄干半
多少鶯梭織未成
燕尾休頻剪

南歌子

欲住還飄雨
將殘未滅燈
酒醒恨難勝
曉看山枕上

淚痕凝

又

添麝更衣後挑朱對鏡時故故弄妝遲日高牽女伴
折花枝

憶少年

小屏殘燭小窗殘雨小樓殘夢銖衣已烟散只蘅蕪
香重錦瑟華年愁裏送便淒涼也無人共傷心白
團扇畫秦娥簫鳳

何

鼎字晴山山陰人康熙五年舉人官長葛縣知縣有香草詞一卷

錦堂春

消受梅花氣味禁持柳絮心情平康院裏多明月知
弄玉靴笙粉印燈前舊夢香癡枕上新盟畫船久
別紅橋路閒殺小啼鶯

雙雙燕

留別胡章若王夢九金子闍張長威

瘦蘆釀雪更林綴春紅冷秋如許征衫纔着雙槳頻
頻催去山也可憐別緒便遮斷故鄉雲樹橫斜帆影
移過盡是舊曾行處還住尋帘沽醕對名勝江山
故人如遇枕濤眠月一任雁聲淒楚夢裏鶯歌燕舞
憶曾共疎狂朋侶萍飄恁日歸來翦燭小窗同賦

張英字敦復桐城人康熙六年進士官至文華

殿大學士謚文端

沁園春題蒼梧詞

別業蒼梧北郭青溪扁舟往來羨秋風尊鱸步兵逸
興春山書畫海嶽仙才笠澤浮家銅峯着屐不許詞
人賦七哀堪酬和有冰清玉映吟賞高懷花間詠
傍妝臺總釵鏡琴香何有哉更翠娥拂素錦毫揮灑
紅兒顧曲舞袖低徊鸚鵡聲中水晶簾捲綺閣風生
笑語開流傳徧寫綵鸞千本清絕纖埃

陳玉璫字廣明武進人康熙六年進士官中書舍

人有耕烟詞一卷

望江南薄暮泛舟東郊

芳堤畔同步小溪橋濃樹一林遮塔影短牆三尺露
花梢野徑轉漁樵

汪懋麟字季角江都人康熙六年進士官刑部主

事有錦瑟詞一卷

憶秦娥

遮團扇春風吹綻桃花片桃花片朝霞半暈殘脂微
濺天然素質鉛華賤從教傅粉何郎羨何郎羨願
爲鸞鏡朝朝相見

何龍文字信周德化人康熙八年舉人

珍傲宋版年

江城子憶別

別時猶自怯春殘剪刀寒坐更闌小語叮嚀珍重記
加餐却愛子規沿路叫歸去也早回鞍而今不覺
已秋還路漫漫恨漫漫暗約當歸何事隔關山只有
相思千里月清露下好同看

宮夢仁

字宗袞泰州人康熙九年會試第一歷官
福建巡撫

蝶戀花茉莉

良嶽當年行樂處珠萼冰鞋移自炎洲路韻比江梅
宜帶雨芬飄山麝偏凝露絕愛佳人臨日暮笑摘
芳菲斜比鸞釵度綉枕聞香香半吐餘香猶挽絲籠
護

徐乾學

字原一號健庵崑山人康熙九年進士官
至刑部尚書有澹園集

鶴沖天題蕪鮫小像和葆勳原韻

圓沙枉渚識是君棲處柳汁染君衣多佳句偏情濃
烟水戲畫作扁舟住儘命傳嘯侶桂槳篷窗不讓當
年桑苧風清日暮鷗鷺隨人去沽酒束生薪和雲
煑喚玉童把篋忽吹散江天雨近前恐未許一捻腰

支消盡柳絲愁緒

王士禛字叔子山東新城人康熙九年進士有古

鉢集

醜奴兒令留別阮亭家兄

去年今月三日嚴寒天欲雪不憚衝寒舊約重來白
板船今年今月回首西陵人又別欲去仍留風馬
雲帆各自愁

李振裕字維饒吉水人康熙九年進士官至戶部

尚書

山花子秋日過錢塘江

一葉飄然自在行層巒回首勢縱橫
鏡好風輕海氣遠浮天竺二月江潮直抵富陽城
歷賓鴻嘹唳處岸莎平

葉燮字星期嘉善籍吳江人康熙九年進士官

寶應縣知縣

遐方怨閨情

妝未了日高升菱花眉暈小蘭葉髻雲橫簾通烟篆
曉痕平寶釵斜膩墜無聲春漸老帶圍輕簷鶻頻
偷報應知鬪草嬴晝長無事理銀箏困人疎雨小池
亭

錢

霞字赤城嘉善人康熙九年進士官承德縣

知縣

憶秦娥

春未老相簾半捲香風好香風好日長人倦殘紅不
掃秦樓百尺簫聲杳王孫何處迷芳草迷芳草畫
眉啼過暗傷懷抱

曹鑑平

字掌公嘉善人康熙十一年舉人官中書
舍人有南溪集

長相思

月朦朧霧朦朧杜宇啼殘畫檻東梨花細雨中
山
幾重水幾重水遠山遙信未通相思伴落紅

徐

倬字方虎德清人康熙十二年進士官翰林
院侍讀後家居加吏部侍郎有水香詞一

卷

柳梢青

老矣疎頑紅塵赤日何事拘牽眼望南雲身依北闕
夢繞西山而今只學枯禪閉老屋蕭蕭暮寒兩屐
徒存五車休問一味偷閒

王鴻緒

字季友江南華亭人康熙十二年進士官
至工部尚書

畫堂春

東風軟透露花香捲簾燕燕歸梁曉霞鏡裏鬪明妝
新樣眉長斜倚回闌獨立低頭笑撚垂楊夜來清
夢到瀟湘獨自思量

王

燮字子和嘉興人康熙十二年進士官阜城

縣知縣遷吏部主事

蝶戀花

春閨

開徧天桃常惹恨燕子啣來特地傳芳信幾度閒園
空落盡如今漸是清明近昨日倚樓閒整鬢柳絮
空簾添與人愁悶春為多情春也困亂紅如雨飛成
陣

馬鳴鑾

字殿聞崑山人康熙十二年進士官至戶

部侍郎

浪淘沙

雙髻欲堆鴉臉暈紅霞鶯啼花影落窗紗十二巫峯
渾是夢雨細雲斜油壁下香車回首天涯紅闌繡
幙阿誰家紈扇暗拋腰帶減自惜韶華

汪鶴孫

字梅坡錢塘人康熙十二年進士授庶吉

士有蕉閣詩餘一卷

浣溪沙

午睡

嫩綠穉穉日半低困人天氣掩深閨近來腰瘦帶應
知繡幄風開疑蝶亂玉樓夢遠怕鶯啼此時心事
倩誰題

國朝詞綜卷五

[Faint bleed-through text from the reverse side of the page, including characters like '天', '氣', '掩', '深', '閨', '近', '來', '腰', '瘦', '帶', '應', '知', '繡', '幄', '風', '開', '疑', '蝶', '亂', '玉', '樓', '夢', '遠', '怕', '鶯', '啼', '此', '時', '心', '事', '倩', '誰', '題']

國朝詞綜卷六

青浦 王昶 纂

性 德三十一首

張翼一首

高層雲十首

胡會恩一首

張集一首

沈三曾一首

沈涵一首

葉舒崇四首

儲右文一首

毛遠公一首

王修玉一首

吳珩一首

趙執信一首

楊大鶴一首

沈朝初二首

性

德原名成德字容若滿洲正白旗人康熙十

二年進士官侍衛有飲水詞三卷

顧梁汾云容若詞一種凄惋處令人不能

卒讀人言愁我始欲愁 陳其年云飲水

詞哀感頑豔得南唐二主之遺

如夢令

黃葉青苔歸路屨粉衣香何處消息竟沉沉今夜相
思幾許秋雨秋雨一半因風吹去

采桑子

誰翻樂府淒涼曲風也蕭蕭雨也蕭蕭瘦盡燈花又

一宵不知何事縈懷抱醒也無聊醉也無聊夢也
何曾到謝橋

又

冷香縈遍紅橋夢夢覺城笳月上桃花雨歇春寒燕
子家 箜篌別後誰能鼓腸斷天涯暗損韶華一縷
茶烟透碧紗

謁金門

風絲裊水浸碧天清曉一鏡濕雲青未了雨晴春草
草 夢裏輕螺誰掃簾外落花紅小獨睡起來悄悄
悄寄愁何處好

浣溪沙

消息誰傳到拒霜兩行斜雁碧天長晚秋風景倍淒
涼 銀蒜押簾人寂寂玉釵敲燭信茫茫黃花開也
近重陽

又詠五更和湘真韻

微暈嬌花濕欲流簾紋燈影一生愁夢回疑在遠山
樓 殘月暗窺金屈戌軟風徐蕩玉簾鉤待聽隣女
喚梳頭

又

蓮漏三聲燭半條杏花微雨濕輕綃那將紅豆記無

聊春色已看濃似酒歸期安得信如潮離魂入夜
情誰招

又古北口

楊柳千條送馬蹄北來征鴈舊南飛客中誰與換春
衣終古閒情歸落照一春幽夢逐遊絲信回剛道
別多時

又

萬里陰山萬里沙誰將綠髮鬪霜華年來強半在天
涯魂夢不離金屈戌畫圖親展玉鴉又生憐瘦減
一分花

蝶戀花

又到綠楊曾折處不語垂鞭踏遍清秋路衰草連天
無意緒鴈聲遠向蕭關去不恨天涯行役苦只恨
西風吹夢成今古明日客程還幾許霑衣况是新寒
雨

南歌子

翠袖凝寒薄簾衣入夜空病容扶起月明中惹得一
絲殘篆舊薰籠暗覺歡期過遙知別恨同疎花已
是不禁風那更夜深清露濕愁紅

又

暖護櫻桃蕊寒翻蛺蝶翎東風吹綠漸冥冥不信一
生憔悴伴啼鶯素影飄殘月香絲拂綺櫺百花迢
遞玉釵聲索向綠窗尋夢寄餘生

鳳凰臺上憶吹簫

錦瑟何年香屏此夕東風吹送相思記巡簷笑罷共
撚梅枝還向燈花影裏催教看燕蠟雞絲如今但一
編消夜冷暖誰知當時歡娛見慣道歲歲瓊筵玉
漏如斯悵難尋舊約枉費新詞次第朱旛翦綵重簾
畔又轉蛾兒重驗取盧郎青鬢未覺春遲

又除夕得梁汾閩中信因賦

荔粉初裝桃符欲換懷人擬賦然脂喜螺江雙鯉忽
展新詞稠疊頻年離恨匆匆裏一紙難題分明見臨
緘重發欲寄遲遲心知梅花佳句待粉郎香令再
結相思辛稼軒客三山有梅花相思之句記畫屏今
夕曾共題詩獨客料應無睡慈恩夢那值微之重來
日梧桐夜雨却話秋池

眼兒媚

重見星娥碧海植忍笑却盤鴉尋常多少月明風細
今夜偏佳休籠彩筆閒書字街鼓已三搗烟絲欲
裊露光微泫春在桃花

秋千索綠水亭春望

藥闌攜手銷魂侶爭不記看承人處除向東風訴此
情奈竟日春無語 悠揚撲盡風前絮又百五韶光
難住滿地梨花似去年却多了廉纖雨

又

遊絲斷續東風弱無語半垂簾幙茜袖誰招曲檻邊
弄一縷秋千索 惜花人共殘春薄春欲盡纖腰如
削新月纔堪照獨愁却又照梨花落

好事近

簾外五更風消受曉寒時節剛剩秋衾一半擁透簾
殘月 爭教清淚不成冰好處便輕別擬把傷離情
緒待曉寒重說

太常引自題小照

晚來風起撼花鈴人在碧山亭愁裏不堪聽那更雜
泉聲雨聲 無憑踪跡無聊心緒誰說與多情夢也
不分明又何必催教夢醒

山花子

欲話心情夢已闌鏡中依約見春山方悔從前真草
草等閒看 環佩祇應歸月下鈿釵何意寄人間多
少滴殘紅蠟淚幾時乾

菩薩蠻過張見陽山居賦贈

窗前桃蕊嬌如倦東風淚洗臙脂面人在小紅樓離
情唱石州夜來雙燕宿燈背屏腰綠香盡雨闌珊
薄衾寒不寒

又寄梁汾茗中

知君此際情蕭索黃蘆苦竹孤舟泊烟白酒旗青水
村魚市晴柁樓今夕夢脈脈春寒送直過畫眉橋
錢塘江上潮

清平樂

風鬟雨鬢偏是來無準倦倚玉闌看月暈容易語低
香近軟風吹過窗紗心期便隔天涯從此傷春傷
別黃昏只對梨花

一叢花詠並蒂蓮

闌珊玉珮罷霓裳相對綰紅妝藕絲風送凌波去又
低頭軟語商量一種情深十分心苦脈脈背斜陽
色香空盡轉生香明月小銀塘桃根桃葉終相守伴
殷勤雙宿鴛鴦菰米漂殘沈雲乍黑同夢寄瀟湘

秋水聽雨

誰道破愁須仗酒酒醒後心翻醉正香銷翠被隔簾
驚聽那又是點點絲絲和淚憶翦燭幽牕小憩嬌夢

垂成頻喚覺一睚秋水 依舊亂蛩聲裏短檠明滅
怎教人睡想幾年踪跡過頭風浪只消受一段橫波
花底向擁髻燈前提起甚日還來同領略夜雨空塔
滋味

臨江仙 寒柳

飛絮飛花何處是層冰積雪摧殘疎疎一樹五更寒
愛他明月好憔悴也相關 最是繁絲搖落後轉教
人憶春山浦裙夢斷續應難西風多少恨吹不散眉
彎

踏莎行

春水鴨頭春山鸚觜烟絲無力風斜倚百花時節好
逢迎可憐人掩屏山睡 密語移燈閒情枕臂從教
醞釀孤眠味春鴻不解諱相思映窗書破人人字

百字令 廢園有感

片紅飛滅甚東風不語只催漂泊石上臙脂花上露
誰與畫眉商略碧甃餅沈紫錢釵掩雀踏金鈴索韶
華如夢爲尋好夢擔閣 又是金粉空梁定巢燕子
滿地香泥落欲寫華箋憑寄與多少心情難託梅豆
圓時柳綿飄處空覓當時約斜陽冉冉斷魂分付殘
角

天仙子 淥水亭秋夜

夢裏蘼蕪青一翦玉郎經歲音書遠暗鐘明月不歸
來梁上燕輕羅扇好風又落桃花片

浪淘沙

紅影濕幽窗瘦盡春光雨餘花外却斜陽誰見薄衫
低髻子還惹思量 莫道不淒涼 早近持觴暗思何
事斷人腸曾是向他春夢裏瞥遇迴廊

又

眉譜待全刪別畫秋山朝雲漸入有無間莫笑生涯
渾似夢好夢原難 紅珠啄花殘獨自凭闌月斜風
起袷衣單消受春風都一例若個偏寒

張

翼字豫章江南華亭人康熙十四年舉人

鶴冲天 題蕪鮫小像和葆飭原韻

鷗汀鶴渚不是君棲處只合鳳池游清平句縱情深
漁浦怎容得扁舟住有二三逸侶琴酒從容猶憶秋
深白苧 霜清烟暮幾度尋花去把釣得銀鱗呼童
煮看鄰舟送酒儘消受篷牕雨桃笙八尺許丸髻吹
簫繡被鄂君情緒

高層雲

字讓苑江南華亭人康熙十五年進士至
太常寺卿有改蟲齋詞一卷

齊天樂 蟬

枕屏曉帶行雲夢却早被伊催斷苦調纔終悽吟還
續遞寫幾番幽怨柳塘聽倦忽竹院涼傳數聲差緩
曲奏迴風蕭蕭落葉玉階滿 愁聞最是旅客對前
村幾樹頽照敬岸響咽尤悲音長轉澀引起離情無
限當年蜀棧和嶺畔啼鴉鄉心曾亂一片秋容澹雲
凝望遠

瑤花 雨中詠白丁香同蒼崑瑁湖

新妝澹抹婉約冰姿似飛瓊清絕輕烟絲雨扶不起
緩躡翠鈿珠纈含顰微睇見鉛水熒熒雙頰消幾番
蝶使蜂媒慘淡髻雲肌雪 朱闌一掬芳塵悵洛浦
凌波飛濺羅襪依稀倩影應滅盡纖弱宮腰裙摺梨
雲夢冷怎禁得繡幃頻揭想晚來無限風情斜映半
鉤新月

薄倖 桃花水

武陵漁艇過幾許烟條露梗試看取回塘新漲色與
花光互映更曉風吹縷晴漪鱗鱗碧浪移船影縱玉
膩難濡粉香空惹祇惜鉛華清冷 好待小雨初收
越印得啼妝妍靚斜陽裏多少沉沉春思生憎輕薄
嬌心性把閒情並逐行雲流轉任雙燕欲疑還省平

湖漠漠飛去飛來薄暝

催雪珍珠蘭

露畹移姿風簾亞翠郢曲譜來應別倩蛾綠紋紗輕
籠冶葉誰染淺檀魚子向碧縷烟裙黏珠纈尋香倦
也素心含處應迷秋蝶幽絕妝乍怯正蟬翼半欹
載來勻貼更霧濕芳叢擬趁涼月試問湘娥認否縱
倚遍江花何曾折待貯得帳底清芬憎被小鬟偷揭

惜秋華 牽牛花

碧篠芳畦引輕絲細眉亂鬢捎露影淡銀河正好嫩
涼初曙麕籬裊裊隨風還倩把翠帚留住住開處有疎
蛩敗葉殘蟬荒樹黛色儘堪妒愛娟娟冷艷映冰
奩眉嫵歆倦花鈿悽絕柳陰當午停梭閒對幽叢任
銷凝隔紗無語愁暮洗秋容最宜纖雨

燕山亭

七月十五夜次友武曾錫鬯融谷覃九

過寓亭看竹同賦

淨洗涼陰看第一番秋月蟾光初滿幽徑客來未了
閒情剩得歲華才半瘦竹捎風漾虛影簾旌低卷談
讌恰潤逼晴畦韭花堪翦回憶小築鷗池引疎翠
娟娟繡苔侵硯還拚今夕當是鄉園須添冷香盈淺
明日重尋應不少軟塵吹面游倦容易對舊時酒伴

澹黃柳

層湖遠碧倒浸蒼巖濕小閣圍山斜照入一片疎紅
冷翠總是江南好秋色 弄殘墨閒窗正岑寂定回
首認烟驛想荒池月澹沙鷗拍菰影蘋香舊村何處
今夜夢輕難覓

齊天樂送葉慕廬歸武昌

軟紅塵鑠長安近還尋楚樓橫笛鄂渚霜催樊山月
冷漫叟杯尊猶濕黃衫烏幘颺一幅蒲帆影翻疎荻
試譜茶經洗甌先點葉家白 幽探曾記雙屐吟情
迷露草風鬢蕭瑟玉葉牋長檀香格小勝事空成陳
迹蒼涼紫陌又一度重經短亭荒驛數盡棲鴉暝烟
村樹隔

燕山亭秋盡聞庭榆落葉聲

枝着新霜牆角老榆寫出秋容如許簾卷日斜影薄
橫枝細響不隨風住掃盡清陰早誤了殘蟬吟露羈
旅望一片蒼雲亂山秋暮 向夜重攪閒愁間冷屋
清燈鼠聲蟲語亭臯候晚沙嘴痕消漫憶古鄉烟浦
簾外蕭蕭帶幾點打窗疎雨聽處正夢遠酒醒未曙
摸魚子題毛會侯垂竿圖

訝娥江綠揉千頃吳綃數尺誰譜烟條故疏斜汀外

珍做宋版印

半拂燕梢柔櫓風欲度挂三扇低篷寫影眠鷗路晚
來佳處正野漲平橋輕蓑小笠漠漠一溪雨 家長
御我亦烟波舊侶投竿當日情緒酒徒盡覓封侯矣
漫向軟塵羈旅商去住趁春水桃花倚牒當沙激逢
君何許但茶竈香籠釣筒詩卷相對鏡中語

胡會恩字孟綸德清人康熙十五年進士官至刑
部侍郎有清芬堂集

南歌子

缺月窺虛牖高風翦敗桐夜涼香炷碧紗空爭奈年
時人病雁聲中 綠綺新愁結紅蕤舊約同歡期如
夢太恩恩又是一簾秋雨颭芙蓉

張集字殿英號曼園青浦人康熙十五年進士
官至兵部侍郎

浣溪沙

輕暎輕寒日易斜半山半水路方賒春歸無跡倩誰
遮 客舍蕭蕭憑好夢故園日日想名花去年雙燕
已還家

沈三曾字允斌烏程人康熙十五年進士官詹事
府贊善有賜書堂集

蝶戀花

風雨一天晴未得芳草菲菲早過清明節多事東風
吹不歇梨花處處飄如雪曉夢方濃誰喚急却是
呢喃低向幽人說無計留春春欲別來年再問春消
息

沈

涵字度汪歸安人康熙十五年進士官至內閣學士

虞美人

新涼曉透孤衾冷誰弄紗窗影聲聲却似子規啼報
道不如歸去不如歸呢喃雙燕思離別別盡江南
客此宵閒夢是誰驚最恨西風落葉兩無情

葉舒崇

字元禮吳江人康熙十五年進士官中書舍人有謝齋集

浣溪沙

孤山別墅有感

彷彿清溪似若耶底須惆悵怨天涯青驄繫處是儂
家生小畫眉分細繭近來綰髻學靈蛇妝成不耐
合歡花

又

柳暖花寒懊惱時春情脈脈倩誰知廉纖香雨正如
絲團就鏡臺烏鰂墨寄來江上鯉魚詞此生有分
是相思

又

潛背紅窗解珮遲銷魂爾許月明時羅裙消息落花
知蝶粉蜂黃拚付與淺顰深笑總難知教人何處
懺情痴

又

斗帳脂香夜半侵幾番絮語夢難尋清波一漾淚痕
深南浦鶯花新別恨西陵松柏舊同心一番生受
到而今

儲右文字雲章宜興人康熙十六年舉人

點絳脣

憔悴心情春衫試著腰圍臃闌干閒凭一碧疎簾靜
那更東風落盡殘紅徑波光映空明如鏡絮拂娉
婷影

毛遠公字季蓮蕭山人康熙十六年舉人榜姓王

有瓊枝詞一卷

南歌子

玉露溥秋草金鐙拂夜花牆外早栖鴉不知天上月
照誰家

王修玉字清修仁和人康熙十七年拔貢生有松

壘堂集

小重山

池館芳菲綠樹濃鷓鴣雙浴水入花叢湘簾低挂玉
堂空閒憑檻人在畫橋東樓上柳龍葱春山芳草

外兩三重當年春恨與誰同今依舊愁鎖小眉峯

吳

璘字公瑜宜興人康熙十八年進士官莆田

縣知縣

八聲甘州 百花洲

指迷離煙樹斷橋邊是處百花洲想輕鷗狎浪文魚
戲沫錦纜牽舟幾度朝朝暮暮簫鼓醉中流傳得蓮
娃曲付與吳謳可歎繁華歇絕把月臺花榭一霎
都收枉珠樓人墮香句鏡奩留說閑愁還無燕子只
暮蟬高柳漫吟秋更無那凭闌望處夕照當樓

趙執信

字伸符益都人康熙十八年進士官左春

坊左贊善有鉛山詩餘一卷

浣溪沙

寒雨聲聲滴小牕清宵偏是到秋長愁人猶是滯江
鄉宿酒醒來難續夢孤衾薄處早驚霜此時爭道
不思量

楊大鶴

字九皋武進人康熙十八年進士官諭德

王阮亭云九皋為陶雲難弟年未及終童

而才情綺逸偶作小詞亦不減晏小山落花入獨立微雨燕雙飛之句也

蘇幕遮

惜花紅噴柳綠掩映湘簾訝許人如玉捲翠幙淺妝
新沐袖拂菱花斜顧湘裙幅鬢雙垂腰一束渾不
勝衣漫說鮫綃薄約數年華應十六鸚鵡偷傳小避
銀屏曲

沈朝初字洪生吳縣人康熙十八年進士官至侍

讀學士有不遮山閣詩餘二卷

如夢令

花裏鶯聲歌溜簾外海棠紅瘦寂寞倚欄杆摘得青
梅如豆低嗅低嗅又是酸心時候

點絳脣

薄病恹恹紅牕欲繡愁添線桃花人面深鎖垂楊院
不是傷春一種閒情倦憑誰倩珠簾斜捲放入雙
歸燕

國朝詞綜卷七

青浦 王昶 纂

彭孫通 十四首

倪燦 一首

汪霏 一首

王頊齡 四首

秦松齡 三首

周清原 二首

徐嘉炎 一首

陸棻 三首

湯斌 一首

尤侗 十首

高詠 一首

方象瑛 一首

毛奇齡 五首

徐釁 三首

吳任臣 一首

彭孫通 字駿孫號羨門海鹽人順治十六年進士

康熙十八年以主事 召試博學鴻詞第

一授編修官至吏部侍郎有延露詞三卷

嚴秋水云羨門驚才絕艷長調數十闕固

堪獨步江左至其小詞啼香怨粉怯月凄

花不減南唐風格

憶王孫寒食

梨雲婀娜柳雲斜閑倚高樓數亂鴉惆悵王孫天一

涯不歸家風雨年年葬落花

生查子旅夜

薄醉不成鄉轉覺春寒重鴛枕有誰同夜夜和愁共
弄 夢好恰如真事往翻如夢起立悄無言殘月生西

浣溪沙 客中小寒食作

客裏佳辰祇自憐白榆初改漢宮烟覆堤柳色正三
眠 芳樹乍聞花氣息小樓幾見月團圓教人無奈
暮春天

醉花陰 和漱玉詞同阮亭作

花影枝枝搖午晝桂炷銷金獸愁病怯登高幾陣西
風吹得羅裳透 闌干星月三更後玉露沾香袖心
事寄誰行約略腰身轉覺秋來瘦

宴清都 螢火

四壁秋聲靜疎簾外數點飛來破暝輕沾葉露暗棲
花蕊亂翻銀井有時團扇驚迴又巧坐人衣相映空
自抱半晌微光願增照金樞景 幾番去傍深林來

穿小幔高低不定隨風欲墮帶雨猶明流輝耿耿隨
家宮苑何在腐草于今無片影向山堂且伴幽人琴
書清冷 金樞月入處李義山隋苑詩于今腐草無螢

火杜詩忽驚屋裏琴書冷

綺羅香 春盡日有寄

翠遠浮空紅殘欲滴簾捲青山無數舊事難尋春色
半歸塵土撲蝶會如夢光陰砑花箋相思圖譜怪東
風不爲吹愁凝眸又見碧雲暮
年來淪落已慣任
一身長是飄零吳楚珠淚絨題恨字分明寄與想南
樓柳絮飛時是玉人夜來凭處應望斷遠水歸帆濛
濛江上雨

花心動早秋客思

幾陣西風涼氣滿林下乍收殘暑極目江天蹴雪驚
沙千里迢遙吳楚殷勤謝茱萸灣水爲儂好向秦溪
去還恐怕關山重疊雙魚無據
冉冉年光欲暮正
思歸未得含情誰語待折疏華寄取一枝又遠隔層
城路倚樓人聽斷腸聲驚秋客到傷心處江南夢一
曲瀟瀟暮雨

一寸金蓮

水面新妝小著紅綃弄烟霧似豔分霞暈倚欄微笑
嬌含檀粉向人低語渺渺愁無侶只成隊鴛鴦來去
乍臨風一種輕盈玉奴初學凌波步
此夜瑤臺月
明香細翠袖沾清露問玲瓏秋藕幾時絲盡鮮妍蓮
子爲誰心苦正隔江欲采盼佳期年華遲暮訴相思
有限無情夢斷西洲路西洲用古樂府語陸龜蒙蓮

花詩無情有恨何人見

浣溪沙

閨情

翠浪生紋點曲池春深閨閣弄妝遲
弓鞋羅襪踏青時
鵝鬢輕分金縷縷
燕釵低顫玉差差
杏花春雨細如絲

又

蟬鬢裁成稱體衣
暄妍風日燕交飛
遠山如黛一行低
雨滴櫻桃隨淚落
心絨荳蔻少人知
殘鶯新絮斷腸詩

桃源憶故人

社日

平皋翠穀濃於染
一幅晴蕪青舊舊
社酒徒零亂
添得紅襟燕
桡榆往事還重見
竊炙歸來春宴人在
櫻桃庭院今夜停鍼線

柳梢青

何事沉吟小窗斜日立
遍春陰翠袖天寒青衫人老
一樣傷心
十年舊事重尋回首處
山高水深兩點眉峯
半分腰帶憔悴而今

踏莎行

春暮

鶯擲金梭柳拋翠縷
盈盈嬌眼慵難舉
落花一夜嫁東風
無情蜂蝶輕相許
尺五樓臺鞦韆笑語青鞵

濕透胭脂雨流波千里送春歸棠梨開盡愁無主

蘇幕遮 婁江寄家信

柳花風榆莢雨試問春光去也何匆遽紅淚飄零千
萬樹縱有黃鶯啼到無聲處 旅顏殘歸計誤日日
尋思臨別叮嚀語欲倩文鱗傳尺素婁水無情不肯
西流去

倪 燦字聞公上元人康熙十六年舉人十八年

召試博學鴻詞授檢討有雁園詞一卷

浣溪沙 暮抵香城寺

逐水尋幽路不窮溪聲一徑入空濛疎鐘遙度古城
東 野菊背開崩石下歸雲橫捲亂流中夕陽將盡
佛燈紅

汪 霏字朝采錢塘人康熙十五年進士十八年

以行人司行人 召試博學鴻詞授編修

官至戶部侍郎

浪淘沙 湖心亭楊柳

翠影接遙天還繫游船柔情黯黯不勝眠彈徹琵琶
今夜月此際誰憐 玉笛晚風前長倚朱闌歌鶯舞
燕自年年寂寂空亭人去後一片寒烟

王頊齡字顥士江南華亭人康熙十五年進士十

八年以太常寺博士 召試博學鴻詞授
編修官至武英殿大學士謚文恭有螺舟

綺語一卷

丁葑園云螺舟詞能于無景中着景此意

近人所未解

長相思 孤館

風淒淒雨淒淒徹夜愁人聽未稀前村聞曙雞
花
飛飛柳依依惆悵春歸人未歸落紅漸漸微

點絳脣 春閨

日暖風和滿園桃杏都開了一聲啼鳥愁入眉尖小

斗捲珠簾極目春光老長亭道馬嘶殘照十里青

青草

清平樂 春暮

寂寥深院門掩春光短依舊楊花如雪亂別却東風

一半 閒庭獨立移時玉釵斜挽花枝驚起多情雙

蝶飛來飛去相隨

少年游 晚晴

霎時疎雨潤花房小徑踏空香淡雲拖處玉虹界斷

返照一溪長 珠簾半卷遙天暮無限意立斜陽十

二烟鬢黛螺描取新試晚來妝

秦松齡 字漢石 號對巖 無錫人 順治十二年進士

授檢討 罷康熙十八年 召試博學鴻詞

復授檢討 官諭德 有微雲詞二卷

柳梢青

小艇橫斜 故園輕別 未是天涯 秋雨殘燈 秋心殘酒
秋色殘花 博山香裊 窗紗夢斷也 西陵路賒 天外
歸雲水邊 歸舫烟際 歸鴉

臨江仙 寒柳

向日風流 今記否 寒鴉宿處 分明一灣 殘照太無情
照他憔悴了 依舊下高城 行處尚疑攀折 盡西風
客路魂驚 樓頭翠管已無聲 紫驟渾不顧 嘶過玉河
冰

鎖窗寒

料峭西風 箇人獨自 下簾庭院 鏡裏眉山 約略寒深
寒淺 問淒涼 心情自知 近來耽閣 閒鍼線 愛長宵久
坐 繡窗微透 一絲烟篆 莫怨韶華 變只一片霜華
清光堪剪 賣珠人去 剩有筆牀 詩卷還猜 他翠袖熏
籠 溫馨宿火 心字展待 相逢月轉 闌干秋水芙蓉面
周清真 原字雅楫 武進人 康熙十八年以監生 召

試博學鴻詞 授檢討 官至工部侍郎 有浣

臨江仙

小徑平蕪秋水接殘陽一片蒹葭拂溪衰柳尚天斜
晚來人不到新雁落晴沙霜雪未濃繒繳遠稻梁
隨意天涯夜深和月立蘆花不隨秋去燕羞共暮棲
鴉

菩薩蠻

畫簾風裊茶烟細頻呼金雀煎勻未指約玉壺寒輕
分小鳳團槐陰低散處葉隱黃鸝語返照上窗紗
棋聲點落花

徐嘉炎

字勝力秀水人康熙十八年以監生召
試博學鴻詞授檢討官至內閣學士有抱

琴齋集

天香龍涎香

燕脯難尋蛟腥易厭冰綃乍傾珠子蟾鑿消烟麝缸
和月做出銷魂滋味鮫宮帳冷漸芳入九微燈裏裊
出雙烟噴碧團來半囊暈紫冷冷水晶簾捲悄凝
寒熏籠壓被斜颺輕絲熨取枕痕釵膩長笛聲聲吹
斷聽水靜微吟夜分未添取金爐氤氳帳底

陸

業字義山平湖人康熙六年進士十八年以

內閣典籍 召試博學鴻詞授編修官至
內閣學士有雅坪詞譜三卷

蔣京少云義山詞體致修潔體物諸作尤
極工細

留客住鷓鴣

夕陽暮占山頭冷風如剪鉤轉格磔又向南雲飛去
啼聲枉是淒楚渺渺江上孤帆留不住木棉花老最
銷魂此際亂峯無數 隔殘雨野水黃昏漫天蘆絮
旅夜難聞更帶幾聲杜宇多少桂陽行客吟罷沾衣
淚添湘竹苦任教斑點似生香熟結擁爐愁炷李太
白詩客自桂陽至能吟山鷓鴣香之佳者有鷓鴣斑

臺城路遼后洗妝樓

九龍雕輦南京駐涼風幾番懷古鏡檻苔荒香渠石
斷惟見啼鴉來去雙虹飲渚早吹漾秋紋亂雲漂絮
荷殿依稀綠楊遮了苑西路 鈿車水流如故想紅
樓舊影妝罷凝佇玉褪犀簾螺銷魚洗還認青山眉
嫵斜陽滿樹響白塔空鈴珮環何處月徑猶聞輦婆
深夜語

燕山亭 七月十五夜同竹垞武曾融谷覃九集

讓園竹屋

垂了簾衣宛在米家書畫船窗坐楸局未停玉子聲
聲聽得賣花車過樹杪涼生吹幾葉絮雲低墮燈火
暈粉莉娟筠翠梢香妥 纔度天上秋期對月徑風
筵又陳瓜果南槽紅友內樣青瓷今宵錦茵拚宛嘶
騎頻催便醉也欲留無那歸可料寫入竹溪有我
湯 斌字孔伯睢州人順治九年進士康熙十八

年以潼關兵備道 召試博學鴻詞授侍
講官至禮部尚書謚文正有潛庵文集詞

附

滿庭芳 秋日閒居

雲澹霜洲雁飛葭浦兩行煙樹柴門紙窗茅屋秋氣
映朝曦壯歲歸田作賦閒居好高臥邱園耦耕侶荷
鋤問訊紅葉認山村 漫論今古事柴桑谷口往蹟
猶存但茶香竹裏酒沸松根倚枕清眠夢覺東籬看
菊蕊堪飡憑欄坐南華一卷諷詠到黃昏

尤

侗字展成號西堂長洲人拔貢生康熙十八

年以永平府推官 召試博學鴻詞授檢

討家居後加侍講有百未詞二卷

曹顧庵云悔庵詞流麗圓轉如細管臨風

新鶯啼樹至其感慨詠諧流傳酒樓郵壁

又天然工妙直兼蘇辛秦柳諸家所長

卜算子 夜憶

秋雨急如箏彈破江南夢
野外西風葉葉吹撼起棲
鴉動 夜永惜燈殘
衾薄知寒重飛盡征鴻
莫寄書 曲冷文君弄

踏莎行 閨怨

獨上妝樓青山如昨
畫眉彩筆春來閣
休彈紅雨濕花梢
淚珠自向心頭落
可恨東風年年輕薄
天涯不管人飄泊
漫將薄倖比楊花
楊花猶解穿羅幕

齊天樂 蟬

小園疎柳斜陽晚
凄然數聲低喚
吸露頻啼迎風乍
咽迸出悲絲
急管宮商偷換
和五夜寒蟿
一天哀雁恨殺螳螂
驚回焦尾素絃斷
當年齊女曾變故宮
衰草外何限秋怨
羅袂無聲玉墀塵滿
落葉幾番零亂
餘音宛轉想動影
低鬟妝殘簾捲
杜老山妻夜飛人
不見予去歲九月
病中詞有不見夜
飛蟬山妻劇可憐
之句今年九月
婦亡亦詞讖也

憶王孫 閨情

一春心事付眉尖
小院無人風雨纖
落盡桃花倚繡
奩思淹淹燕子
歸來不捲簾

轉應曲春雨

春雨春雨花上淚痕幾許東風吹到紗窗日日愁來
斷腸腸斷腸斷又續新愁一半

天香龍涎香

雲氣盤山雨痕粘草海天遙識龍睡細剪香涎平分
瑞腦汎水滲沙同膩龍涎上品汎水文曰滲沙烟鬢
霧髻髮髯見織綃泉底檀口唾花幾點絲絲篆成心
字猶憶瑣窗半閉裊金鳧共消殘醉惆悵遺芳夢
杳蘅蕪誰寄聚窟返魂何處空留下餘薰舊鴛被羸
取鮫人玉盤珠淚

多麗夏景

畫梁間日長午夢初殘倚薰風暈紅如醉無言情思
闌珊捲桃笙自尋墜珥掩金詞斜撲輕紈茉莉茶甘
鷓鴣香細儘堪消暑小屏山無心理鈿箏瑤管棋局
也慵彈間排遣碧敲冰脆紅點梅酸侍兒報花梢
月上清光怯映越羅單浴蘭湯微揩粉汗插犀梳亂
挽雲鬟院落沉沉夜涼似水蕭郎頻喚展琅玕還一
笑背人行去等待向更闌却尋到薔薇架下獨凭欄
杆

滿江紅余淡心初度和梅村韻

對酒當歌君休說麒麟圖書行樂耳柳枝竹葉風亭
月榭滿目淒涼汾水雁半生憔悴章臺馬問何如變
姓隱吳門吹簫者 蘭亭禊香山社桐江釣華林射
更平章花案稱量詩價作史漫嗤牛馬走詠懷却喜
漁樵話看孟光把盞與眉齊皋橋下

又憶別阮亭儀部兼懷西樵考功湖上

我發蕪城趁競渡一江風漲爲寄語池塘春草阿連
無恙白舫已乘東冶下青驄尚躍西冷上問錢塘可
接廣陵潮雙魚餉 採蓮棹湖心漾折柳曲橋頭唱
辦十千兌酒餘杭新釀王子正招緱嶺鶴孫登也策
蘇門杖待歸來贈我兩峯圖空濛狀

念奴嬌贈吳梅村先輩用東坡赤壁韻

江山如夢歎眼前誰是舊京人物走馬蘭臺行樂處
尚記紗籠題壁椽燭衣香少年情事頭白今成雪杜
陵野老風流獨數詩傑 更聽法曲淒涼四鉉彈斷
清淚如鉛發莫問開元天寶事一半曉星明滅我亦
飄零十年湖海看雨絲風髮何時把酒浩歌同送明
月

高 詠字阮懷宣城人康熙十八年以貢生 召

試博學鴻詞授檢討

聲聲慢詠柳

隋隄銷翠漢苑飄金啼鶯曉斷高枝小繫青驄忽聽
玉笛橫吹江南舊栽幾樹未攀條先已含悲重記取
只當年張緒髣髴丰姿 驀地東風披處永豐坊那
便腰細難支似媚還愁偷舒眠眼修眉催人鬢容易
老是和烟經雨垂垂春占盡向紅亭又管別離

方象瑛

字渭仁遂安人康熙六年進士候選中行
評博十八年 召試博學鴻詞授編修官

至侍講

南柯子 欽雅黃宅

十日吳城臥三年越客吟良朋深喜愜幽襟長擬乘
春過訪讀書林 燒燭銀膏淺聽歌玉漏深勝游不
得附知音惆悵梨花庭院月沉沉

毛奇齡

初名姓字大可蕭山人康熙十八年以監
生 召試博學鴻詞授檢討有毛翰林集

填詞六卷

姜汝長云河右詞其旨精深其體溫麗戶
網粘蟲枕聲停釧吹簫苦脣朱之落夢歡
愁臂紅之銷腰慵結帶時作縈迴鏡喜看
花暗相轉側此真靡曼之瑋辭夫豈纖庸

憶王孫

東風吹柳覆金堤夾岸紅樓望去迷日映游絲捲幔
低畫橋西一樹嬌花鳥自啼

點絳脣送春

惱殺啼鶯逢人還道春歸去留人不住誰要留春住
花絮茫茫萬點愁人緒歸向處春歸無路莫是人
歸路

滿庭芳聽商生徵說彈琴永恩樓

微雨涼收風翻橡葉女牆斜點三星永恩樓上躡履
暗中聽何處瑤琴初發珠簾外流水泠泠停聲久千
崖忽墮玄鶴舞青冥汾亭遙奏後簫憐秦女瑟怨
湘靈奈晚風吹角秋雨淋鈴此際琴心到處東家女
誰在銀屏屏中睡今宵無夢有夢也應醒

南柯子淮西客舍接得陳敬止書有寄

驛館吹蘆葉都亭舞柘枝相逢風雪滿淮西記得去
時殘燭照征衣曲水東流淺盤山北望迷長安書
遠寄來稀又是一年秋色到天涯

南浦和徐西崖贈別

最傷心處是紅亭載酒上河橋多少畫欄干外楊柳

正垂條五兩南風欲度趁申江幾曲暮歸潮奈離筵
人散贈鞭情重雙淚落征袍 此地遨遊堪戀遍亭

臺春意鬧花梢長載佳人油壁深夜教吹簫况值歌
成南浦也為君重撥紫檀槽且和歌一闋問當前誰

最魂銷

徐 鈞 字電發吳江人康熙十八年以監生 召

試博學鴻詞授檢討有菊莊詞一卷楓江
漁父詞一卷

宋牧仲云菊莊憶秦娥菩薩蠻諸闋猶有
南唐遺韻 梁雲麓云菊莊高處在穠豔

中時見本色 葉景鴻云吳孝廉兆騫因
丁酉科場事戍寧古塔將菊莊詞與彈指

側帽三種帶至會寧有東國都護府記官
仇元吉前觀察判官徐良崎見之用金一

餅購去仍各題一絕句於左仇元吉題菊
莊詞云中朝寄得菊莊詞讀罷烟霞照海

湄北宋風流何處是一聲鐵笛起相思故
王阮亭先生有新傳春雪詠蠻徽織弓衣

之句今載漁洋山人續集中

鳳棲梧 春草

廉纖絲雨春陰重嫩草平鋪低把金鞍鞚綠遍天涯
無半縫憐伊歲歲和愁種飛絮落花都不動斗帳
微寒自做池塘夢明日踏青誰與共芳郊怕損鞋頭
鳳

減字木蘭花

垂鞭欲暮踏遍天涯荒草路撲面西風昨夜濃香是
夢中遠山幾點牽惹離愁渾欲斷衰柳鴉啼一片
殘陽在客衣

江城子 閨怨

芳容消瘦柳腰柔話離憂捲簾鈎猶記別時南浦繫
扁舟月誓香盃成底事千種意與東流從今羞整
玉搔頭恨悠悠懶凝眸非是落花時節怕登樓縱掃
雙眉青似黛鎖不斷許多愁

吳任臣

字志伊仁和人康熙十八年以諸生

召

試博學鴻詞授檢討

滿江紅 吳越故宮

鳳舞龍飛興王地澄江似練憶當日瑠玕金馬幾番
血戰東府功勞成已往江南保障猶堪羨嘆百年轉
盼幾多時如流電遺闕杳餘荒甸殘碣仆多蒼蘚
問而今何處丹書鐵券井上風梧饑鳥墜殿前烟草

